

摘藻堂四庫全書薈要

經部

欽定四庫全書薈要

經部

欽定春秋傳說彙纂卷十四

欽定四庫全書薈要卷一千八百五

經部

欽定春秋傳說彙纂卷十四

丁襄王  
丑八年

十有六年

齊桓四十二年晉惠七年衛文十六年蔡莊二年鄭文二十九年曹共九

年陳穆四年杞成十一年宋襄七年秦穆十六年楚成二十八年

春王正月戊申朔隕石于宋五是月六鷁退飛過宋都

隕公作賈鷁五歷切  
穀作鷁過古禾切

左傳

十六年春隕石于宋五隕星也六鷁退飛過宋都風也周內史叔興聘于宋宋襄公問焉曰是

何祥也吉凶焉在對曰今茲魯多大喪明年齊有亂君將得諸侯而不終退而告人曰君失問是陰陽之

事非吉凶所生也吉凶由人吾不敢逆君故也

公羊

曷為先言實而後言石實石記聞聞其碩然視之則石察之則五曷為先言六而後言鷁六鷁

退飛記見也視之則六察之則鷁徐而察之則退飛五石六鷁何以書記異也外異不書此何以書為王者之後記異也

穀梁

先隕而後石何也隕而後石也于宋四竟之內曰宋後數散辭也耳治也六鷁退飛過宋都先

數聚辭也目治也君子之於物無所苟而已石鷁且猶盡其辭而況於人乎故五石六鷁之辭不設則王道不亢矣民所聚曰都

胡傳

隕石自空凝結而隕也退飛有氣逆驅而飛也聖人因災異以明天人感應之理而著之於經

垂戒後世也和氣致祥乖氣致異人事感於下則天  
變應於上苟知其故恐懼修省變可消矣宋襄公以  
亡國之餘欲圖霸業五石隕六鷁退飛不自省其德  
也後五年有孟之執又明年有泓之敗天之示人顯  
矣聖人所書之義明矣可不察哉

集說

杜氏預曰隕落也聞其隕視之石數之五各隨  
其聞見先後而記之又曰是月隕石之月鷁水

鳥高飛遇風而退宋人以為災告於諸侯故書  
氏敞曰公羊云是月者僅逮是月也不日者晦也非  
也夫晦朔者天之所有春秋取朔棄晦何當於義乎  
又曰穀梁子曰石無知之物故日之鷁微有知之物  
故月之非也言是月者宋不告日嫌與五石為一日  
故分別之耳穀梁本以日月解經因此以誣聖人欲  
後世信之豈實然乎蘇氏轍曰莊五年書曰星隕  
如雨見星之隕而不見其為石也今日隕石于宋五

見其為石而不見星之隕也鷓鴣大鳥也退飛逆飛也書失常也程子曰隕石于宋自空凝結而隕六鷓鴣退飛倒逆飛也倒逆飛必有氣驅之也春秋所書災異皆天人響應有致之之道故石隕于宋而言隕石夷伯之廟震而言震夷伯之廟此天應之也人以淺狹之見以為無應其實皆應之然漢儒言災異皆牽合不足信儒者見此因盡廢之張氏洽曰星隕為石不祥也鷓鴣退飛不順也宋襄欲圖霸而無其德故天出怪異以警懼之卒之五年被執六年兵敗天之示人顯矣陳氏深曰星陽之象見於上而動忽隕而為石石陰之類墜於下而靜是陽化為陰動極而靜精氣返為頑礦也獨見於宋者齊桓終而宋始霸也然宋無其德故天見災異之象於其地以警悟之也而宋不知警鷓鴣水鳥遇風退飛欲進反退倒逆而飛其宋襄欲霸反為楚辱之兆也萬氏孝恭曰梁山沙鹿亦無知之物胡為而不日麋與蜚亦微有知

胡為而不月也 汪氏克寬曰邵子云星在地則為石石在天則為星此言隕石蓋星墜於天半空凝結至地而成石也 季氏本曰石隕者陽不翕也 鷁退者陰逆驅也此正氣分而妖祲進之象也 羅氏喻義曰物之遠者惟星言隕星未若言隕石手可得而捫也微者惟風言異風未若言受風之鷁目可得而察也星隕而石貴化為賤不善化者也 鷁飛而退前變為却不善變者也 余氏光曰言宋則散在四鄙言都則專在國中

宗經書是月非止嫌同日也或鷁之退飛不止一日故以是月槩之也公羊以是月為晦穀梁以有知無知分日月皆非也 劉氏駁之詳矣

### 三月壬申公子季友卒

公羊

其稱季友何賢也

穀梁

稱公弟叔仲賢也大夫不言公子公孫疏之也

胡傳

季者其字也友者其名也大夫卒而書名則曷為稱字聞諸師曰春秋時魯卿有生而賜氏者

季友仲遂是也生而賜氏者何命之為世卿也季子忠賢在僖公有翼戴之勤襄仲弑逆在宣公有援立之力此二君者不勝私情欲以異賞報之也故皆生而賜氏俾世其官經於其卒各以氏書者誌變法亂紀之端貽權臣竊命之禍其垂戒遠矣

集說

孔氏穎達曰如仲遂叔肸之類皆名字雙舉陸氏淳曰趙氏云季友去邪輔正以安公室魯

大夫莫之能及是以褒之葉氏夢得曰此公子友也何以言季友猶仲遂始賜族也春秋之世有生而



賜族者諸侯討宋亂取華督賂而立華氏此周之末造也然則友未氏而先見季遂未氏而先見仲非以世卿故志其始賜族而特書之歟朱子曰季子賜族亦只是時君恩意張氏洽曰書季友蓋公子友以立僖公之功生而賜之氏俾世其卿也故特書其氏以著待大臣不以禮法為陰始疑之戒呂氏大圭曰春秋之初公之子為大夫則稱公子公子之子為大夫則稱公孫非公子公孫而為大夫則但書名自僖公以後則皆書族且使之世世為卿矣是故魯有仲孫叔孫季孫臧孫齊有高氏國氏崔氏陳氏衛氏有孫氏甯氏晉有卻氏欒氏韓氏趙氏魏氏鄭有罕氏駟氏游氏皆世卿也先王之禮制蕩然矣趙氏孟何曰大夫卒名則其兼字之何也襄恤之異數也季友僖之叔父也而有功於僖仲遂宣之叔父也而有功於宣其喪之有加禮焉故卒皆字之叔肸非有功而以母弟之親宣公喪之視季氏襄仲故三臣者

皆世為卿也汪氏克寬曰宋立華氏魯立叔孫氏當時賜族率以為常春秋諸侯以殊禮異數寵遇其臣至有生而賜諡如衛靈之於北宮喜折朱鉏不特生而賜族矣

案季友討逆定亂功在公室經書公子而名字雙舉者公穀以為賢之是也宣十八年公弟叔肸卒書法與季友同蓋友有社稷之勲肸有通恩之美其賢相等肸以宣公尚存故稱公弟爾胡傳以為生而賜族其說亦正惟與仲遂竝譏似非其倫然季子忠賢仲子弑逆亦各分別言之矣劉氏敞引仲遂以駁公穀不知仲遂之卒削公子而不書正其弑逆之罪也豈季友之比乎又謂仲氏殺子赤季氏出昭公皆世卿成禍者是以仲遂為仲孫氏尤謬

夏四月丙申鄆季姬卒

集說

張氏洽曰內女出嫁者紀伯姬叔姬宋共姬皆書其葬獨鄆季姬杞伯姬不書葬

湛氏若水

曰禮諸侯之女嫁為諸侯夫人者有大功之服焉故赴其卒則史書之聖人存之以致親親之義爾其書葬不書葬史有詳略爾

案不書葬者魯不會也僖公怒鄆子之不朝而止季姬及來朝而始聽其歸蓋怨尚未釋故葬不往會也若果愛其女使自擇配則季姬之葬必有過禮之舉春秋將特書之矣胡傳書卒奪葬之說不可從

附錄左傳

夏齊伐厲不克救徐而還

秋七月甲子公孫茲卒

茲公作慈

集說

杜氏預曰茲叔牙子叔孫戴伯也高氏閌曰此公子牙之子也世秉魯政至春秋之終而猶

絕未

附錄左傳

秋狄侵晉取狐廚受鐸涉汾及昆都因晉敗也王以戎難告於齊齊徵諸侯而戍

周冬十一月乙卯鄭殺子華

狐廚杜注晉邑臨汾縣西北有狐谷亭孔氏穎達以為即狐廚今屬山西平陽府襄陵縣受鐸杜

注晉邑昆都杜注晉邑今平陽府南有昆都聚

冬十有二月公會齊侯宋公陳侯衛侯鄭伯許男邢侯

曹伯于淮

淮杜注臨淮郡左右

左傳

十二月會于淮謀鄆且東略也城鄆役人病有夜登丘而呼曰齊有亂不果城而還

穀梁

兵車之會也

集說

杜氏預曰鄆為淮夷所病高氏閔曰邢侯始與會而在鄭許之下者此齊次之也呂氏祖

謙曰桓公自葵丘之會志得意滿霸業漸衰城一小國而役人如此蓋是時管仲已死惑於內寵志慮昏蔽故前輩謂齊桓中主管仲輔之則治豎刁易牙開方輔之則亂此言極是萬氏孝恭曰許以男而先於邢曹邢以侯而後於鄭許聖人之作春秋從主會者之所為而無所改正所以著其罪也王氏元杰曰齊桓享國三十餘年經營霸業之勤安攘內外之慮自會北杏之始及於會淮之終衣裳之會十一兵車之會四盟幽而下葵丘以前衣裳不敵血兵車無大戰此霸業之所以盛也葵丘以後會淮以前鹹之會避狄而遷杞牡丘之盟次匡而救徐此霸業所以衰也至於淮夷病鄆桓率諸侯而東略即其國而會

之齊霸於是乎衰其事亦終於此矣汪氏克寬曰  
桓公安攘之志至會淮而愈怠矣會淮之前楚伐黃  
滅黃而不能恤狄侵衛侵鄭而不能遏簡於存杞不  
若存邢之功緩於救徐不若救許之速宜淮夷之微  
亦肆其暴抑有所窺而動也卓氏爾康曰邢侯未  
嘗與齊桓會盟而會淮獨忽與焉何也邢自請從於  
會爾邢舊屬於衛十八年與狄伐衛宣不堪衛之徵  
求耶欲伐衛故今年請從於會猶介人欲伐蕭而先  
來魯也

戊襄王十有七年

齊桓四十二年晉惠八年衛文十七年蔡莊三年鄭文三十年曹共十年

陳穆五年杞成十二年宋襄八年秦穆十七年楚成二十九年

春齊人徐人伐英氏

英氏杜注楚與國今江南廬州府六安州西有英氏城接英山縣境

左傳

春齊人為徐伐英氏以報婁林之役

集說

劉氏敞曰何休曰稱氏者春秋前黜之非也英氏者國也國之號或一字或二字或三字非若

甲氏潞氏也今縣有尉氏者亦可封國又何謂乎胡氏銓曰楚人病徐齊桓不能服楚而伐其與國是

遷戮也

張氏洽曰英氏皋陶後之封也為徐伐英

氏桓公之興師未矣

趙氏鵬飛曰徐人將報婁林

之役而無以撼楚也故齊為之伐英氏英氏何與於楚敗徐者楚而英氏受兵報怨蓋已不直矣齊能服

楚則英氏將為齊役如江黃爾憾在楚而不能制乃曰離其與國吾見齊侯威德兩衰伯業止於是也功

烈如此其卑見於斯矣

附錄左傳

夏晉太子圉為質于秦秦歸河東而妻之惠公之在梁也梁伯妻之梁嬴孕過期卜

招父與其子卜之其子曰將生一男一女招曰然男  
為人臣女為人妾故名男曰圉女曰妾及子圉西質

妾為宦  
女焉

夏滅項

項杜注項國汝陰項縣今河南開封  
府項城縣東北六十里故項城是也

左傳

師滅項淮之會公有諸侯之事未  
歸而取項齊人以為討而止公

公羊

孰滅之齊滅之曷為不言齊滅之為桓公諱也  
春秋為賢者諱此滅人之國何賢爾君子之惡

惡也疾始善善也樂終桓公嘗有  
繼絕存亡之功故君子為之諱也

穀梁

孰滅之桓公也何以不言桓公也為賢者諱也  
項國也不可滅而滅之乎桓公知項之可滅也

而不知己之不可以滅也既滅人之國矣何賢乎君  
子惡惡疾其始善善樂其終桓公嘗有存亡繼絕之



功故君子  
為之諱也

胡傳

案左氏淮之會公有諸侯之事未歸而取項齊人以為討而止公然則滅項者魯也聖人於魯

事有君臣之義凡大惡必隱避其辭而為之諱今此滅項其惡大矣曷不諱乎曰事有隱諱臣子施之於君父者也故成公取鄆襄公取郛昭公取鄆皆不言滅而書取程氏以為在君則當諱是也若夫滅項則僖公在會執政之臣擅權為惡而不與之諱此春秋尊君抑臣不為朋黨比周之意也

集說

陳氏岳曰凡書外事各言其國內事不言我外事如齊師滅譚齊人滅遂之類是也內事則取

汶陽田取鄆取郛之類是也未有書外事不言其國未有書內事而言魯者蓋言國以別內也陳氏傳

良曰滅項非公命也向也費伯帥師城郎非公命不書此何以書城郎常事滅項非常事也是故必常事

也譏不及公則不書苟非常則謹書之書滅項失兵權之漸也襄公在晉書邾庶其來奔昭公在晉書莒牟夷來奔雖非公命皆非常也春秋之季大夫不稟命於諸侯非但魯也鄭伯會于夷儀鄭公孫舍之帥師入陳蔡侯會于召陵蔡公孫姓帥師滅沈春秋必謹而志之也黃氏仲炎曰經書夏滅項猶言夏取

邾秋取根牟家氏鉉翁曰或曰內滅國書取此何以書滅曰公未歸魯執政所為是以不諱所以著強

臣之罪程氏端學曰先書滅項後書公至自會則大夫擅國政握兵權可知朱氏睦樸曰先儒以滅

項為僖公在會季孫所為者非也夫季孫行父當祖父卒其父無佚早亡時尚稚年況當是時祿未去公

室政未逮大夫終僖公朝未專國政焉得擅為此事乎張氏溥曰僖公在淮兵忽及項無王命而滅小

國齊將執公以歸正伯討也

案左氏謂公未歸而滅項胡傳及諸家多從之相沿已久今主其說然以城楚邱之例例之公穀以為齊滅者於理亦通蓋不書齊者蒙伐英氏之文也春伐英氏夏滅項與襄十年春會柎夏滅偃陽同一書法以項為魯滅何不偃陽為魯滅也若謂彼多一遂字則此以滅承伐彼以滅繼會其文更不相蒙矣蓋會淮之後齊以淮夷之事委魯統率而自與徐人伐英滅項故僖公經略之久至於九月乃歸爾泮水閼宮之頌皆言魯僖有服淮夷之功豈得全無事實徒爾頌禱他年又不見有南國之師其在此役未可知也若胡氏安國謂滅項為季孫所為則非矣當是時季友已卒友子無佚不見於經經不書其卒是未為卿也友卒之後魯卿奉命而出者公子遂叔孫得臣公孫敖三人而已文六年行父始如齊是無佚卒行父幼及其既長而後為卿也然則滅項之季孫何人耶

秋夫人姜氏會齊侯于卞

卞皮彥反 卞杜注魯國卞縣今故卞城在山東兗州府

泗水縣東五十里

左傳

秋聲姜以公故會齊侯于卞

集說

趙氏匡曰參譏之 高氏閌曰論其情則可矣而禮則不可也小白入魯地而會聲姜能無嫌

乎 趙氏鵬飛曰齊侯歸自會道由乎魯夫人須其至也會之于卞非禮也於時公未至而夫人出會婦人既嫁從夫公不在而夫人出境會齊侯僖公閨門之令可知也此尤甚於陽穀之會陽穀之會公與俱行令夫人獨會之則夫人蓋亦專矣 吳氏澂曰夫人齊女也要齊侯於路而會之非齊侯已歸而再出會姜氏也婦人無外事魯之諸夫人聲姜頗為賢婦詩人以令妻頌之而猶有此失蓋稔於見聞之非盲

於禮義之正是以好成人之美者惜焉卓氏爾康  
曰卞為齊桓歸國所經之地夫人因桓公在境而會  
之婦人送迎不出門見兄弟不踰閭況  
僖公尚未至國而私自出會非禮甚矣

## 九月公至自會

左傳

九月公至書曰至自會猶有諸侯之事焉且諱之也

集說

杜氏預曰恥見執託會以告廟蘇氏轍曰不言齊人之執諱之也家氏鉉翁曰為滅項故

齊侯止公至是乃得歸曾不討其擅興之罪魯之威權自此下移吳氏澂曰以夫人會齊侯故公於中

路得釋而歸公未至齊故云至自會季氏本曰僖公去國日久又以為齊所止而歸故受賀而以至書案齊以滅項止公聲姜會齊侯請而釋之因以至自會為諱此左氏之說也公穀以項為齊滅而夫人會

卞公至自會皆不發傳或謂公以滅項而見止則夫  
人當往請於齊不能致齊侯於魯地公為齊所止而  
歸則當至自齊以見意不必  
致會以沒其實其說亦通

冬十有二月乙亥齊侯小白卒

左傳

齊侯之夫人三王姬徐嬴蔡姬皆無子齊侯好  
內多內寵內嬖如夫人者六人長衛姬生武孟

少衛姬生惠公鄭姬生孝公葛嬴生昭公密姬生懿  
公宋華子生公子雍公與管仲屬孝公於宋襄公以  
為大子雍巫有寵於衛共姬因寺人貂以薦羞於公  
亦有寵公許之立武孟管仲卒五公子皆求立冬十  
月乙亥齊桓公卒易牙入與寺人貂因內寵以殺羣  
吏而立公子無虧孝公奔宋十二月乙亥赴辛巳夜  
殯

集說

呂氏本中曰桓公雖能用管仲有一匡天下之功然仲無正心誠意格君之學徒急於一時之

功利卒致五子之亂其所以有始無終者家法不正也管仲且有三歸之失豈能正其君哉趙氏鵬飛

曰修內者王修外者霸修內者逸修外者勞修內者本於心遇機之來則應之機靜則止何勤何怠修外

者本諸物物來無窮而智力有限一日少懈則智力有窮矣齊桓五伯之盛其初會北杏以求諸侯諸侯

未和伐宋以為鄆之會伐鄭而為幽之盟諸侯無貳矣而後伐戎伐徐徐戎率服則救鄭以示威於南伐

山戎以示威於北定魯之難救邢之危衛滅而齊封之杞滅而齊城之內之諸侯一德事齊可以南征楚

也則會江黃以犄楚之後取舒庸以折楚之臂然後興次陞之役成召陵之功則攘外之功成矣外雖定

而王室未寧於是為首止之會定世子之位以示尊王之心襄王踐祚又為之合葵丘之會率諸侯以聽

於冢宰而王室定矣內和諸侯外攘彊楚上定王室桓公蓋以三王之功不我過也則怠心生狄滅溫齊不問楚滅黃齊不救狄侵衛齊不知既而楚謀知其怠而易與也於是深履東夏而伐徐桓公合八國諸侯于牡丘顧望不進乃命大夫救之而徐卒底於敗雖伐厲伐英氏桓公皆不親也卒之閨門無法六子為讎斂不以禮葬不以時一桓公耳而前日之桓公非今日之桓公何也勤怠之殊也勤怠之意何從生修外而不修內也李氏廉曰桓公自莊九年入國十三年始伯迄僖十七年凡三十九年吳郡李氏曰王道流行侯伯受職古未始有伯也以古之未始有伯而齊桓實造端則桓為首罪矣而春秋或予桓何哉蓋黜其義而錄其功也功義不相掩而後伯者之是非斷矣大抵春秋之世盛衰凡三變桓公之未興與桓公之方伯及桓公之既沒世變各異也王臣下聘而不報王師出伐而無功凡伯書伐戎強於北蔡



師書敗荆盛於南鄭分許鄧宋廢鄭嗣紀小而併於齊邲弱而偪於魯此桓公之未興也王禁明而王臣不下聘者六十年盟會同而諸侯無私爭者三十載序績召陵而荆帖矣陳旅聶北而狄退矣獻捷過魯而我弭矣此桓公之主伯也天王出居而官守不問衛滅懿親而義師無討楚書子而主會矣狄書人而參盟矣此桓公之既沒也然桓公一人之身盛衰又凡三變圖伯之初定伯之日及成伯之後得失頗殊也伐邲侵宋侯度未一入蔡侵鄭戎疾未殄滅遂降鄆履事未久設施多舛遇穀盟扈閔理未熟檢防易肆蓋桓公圖伯之初也貫澤而下葵丘以前衣裳不敵血兵車無大戰仲尼稱其一匡孟子與其為盛在是數年桓公定伯之日也九國叛而萌震矜管仲死而放繩墨城杞貶於城邢救徐急於救許伐黃則外憂起會卞則家法虧蓋桓公成伯之後也驗春秋大勢之三變則桓公主伯為有功即桓公一身之三變

則桓公立功為不遠功過  
乘除齊伯之顛末可考矣

己襄王  
丑十年

十有八年

宋襄九年齊孝公昭元年晉惠九年  
衛文十八年蔡莊四年鄭文三十一

年曹共十一年陳穆六年杞成十  
三年秦穆十八年楚成三十年

春王正月宋公曹伯衛人邾人伐齊

宋公下公  
有會字

左傳

宋襄公以諸侯伐齊  
三月齊人殺無虧

穀梁

非伐  
喪也

集說

杜氏預曰納孝公  
劉氏敞曰傳曰伐齊以納  
公子昭也伐齊以納公子昭則何以不曰納齊

公子昭於齊不與納也曷為不與納諸侯失國諸侯  
納之正也納公子昭非正也立嫡以長不以賢立子

以貴不以長貴鈞以年年鈞以德納公子昭非正也  
又曰宋襄公有憂天下之心伯天下之意而道不足  
也故合諸侯舉大衆不務率義而先為不正以矜其  
力此其所以無成功也 張氏洽曰長幼有定分桓

公管仲不能自制其尊卑正否之辨而輕屬幼少以  
為亂階君臣既失其制命之義矣今桓公未葬長子  
既立宋襄不能從宜因勢順其少長以撫定之使得  
以終桓公之喪乃成桓之私意帥四國之諸侯奉少  
奪長大亂齊國春秋書宋公以為戎首深罪之也  
趙氏鵬飛曰宋襄伐齊納孝公殺無虧知奉齊侯之  
遺言而不計其所納者之正不正也立子以嫡無嫡  
以長齊之六子均庶也均庶則無虧長長當立矣而  
託孝公於宋何耶母寵則子尊桓公之私也宋襄方  
有圖霸之謀而首從齊於邪非義也逐人之正而納  
不正故聖人不書納不與其納如會于袤伐鄭不書  
納突也然則宜貶矣何以書爵蓋致是師者桓公也

其實不啓於宋故書爵以見兵自齊招非宋之罪也  
程氏端學曰齊桓帥諸侯尊天子生民息肩四十  
年宜其既沒而人益思之然死僅踰月  
而諸侯伐之者身不修而家不齊也

附錄左傳

鄭伯始朝於楚楚子賜之金既而悔  
之與之盟曰無以鑄兵故以鑄三鐘

夏師救齊

穀梁

善救齊也

集說

杜氏諤曰傳言三月齊人殺無虧則無虧已殺  
矣今魯以師救之亦以志其緩也程氏端學

曰稱師將卑師衆也諸侯非王命不得擅興  
師然諸侯伐齊而魯救之猶為彼善於此

五月戊寅宋師及齊師戰于廩丘齊師敗績

廩杜注齊地  
在今濟南府

歷城縣界

左傳

齊人將立孝公不勝四公子之徒遂與宋人戰夏五月宋敗齊師于鹹立孝公而還

穀梁

戰不言伐客不言及言及惡宋也

集說

杜氏預曰無虧既死曹衛邾先去故宋師獨與齊戰王氏沿曰無虧既立踰年之君也而宋

人脅齊殺之將立孝公復與齊人戰四公子之徒爭國宋伐喪皆不義也孫氏復曰此以宋主兵者不

與宋襄伐齊也宋襄伐人之喪擅易人之主甚矣劉氏敞曰公羊曰曷為不使齊主之與襄公之征齊

也非也晉卻克及齊侯戰于鞏寧可亦曰與晉卻克之征齊乎所異於晉者何哉孫氏覺曰幸其喪乘

其亂伐之以為利宋有罪矣程子曰書宋及曲在宋也奉少以奪長其罪大矣齊師敗績書敗責齊臣

也。胡氏寧曰：稱師見其用大衆也。而貶在其中矣。是以師為重，以襄公為輕矣。問宋公伐齊為納公子昭也，何以不書納公子昭于齊乎？曰：不與納也。納昭非正也。公伐齊納糾，亦非正，則何以書書納糾？所以著莊公之罪也。止書伐齊而不書納糾，則莊公得復讎之義矣。或書或不書，其義自異，不可不察也。陳氏傳良曰：此宋公也。其稱師何？於是齊桓公與管仲屬孝公於宋襄公，以為太子而桓公卒，寺人貂立。公子無虧、孝公奔宋，襄公以諸侯之師伐齊，立孝公而還。春秋貴義不貴惠，尚治不尚功，託人之孤而動天下之兵，至於交戰是伐喪而已矣。雖然，孝公不言納，孝公言納則疑於齊糾，邪捷留宋襄之義，僅異於魯莊、晉趙盾而已。李氏廉曰：宋襄伐齊之事，公羊以為善，宋蓋彼以莊二十八年齊人伐衛，衛人及齊戰，為予衛罪，齊之書是以何休曰：戰言及者，所以別客主，直不直也。今宋言及明，直在宋矣。鄭曰：及者，別異。

客主不施於直不直直不直自在事而已鄭說固足以辨何氏之失然兵凶戰危何得汲汲欲戰故凡為志乎戰者春秋皆貶之在主人而及客則非處已息爭之道在客而及主人又豈仗義執言之師乎故春秋書伐而戰者三獨宋公以客及主者乃變文以深貶宋也穀梁之說精矣

## 狄救齊

穀梁

善救齊也

胡傳

伐齊之喪奉少奪長其罪大故其責詳書師救齊者善魯也救者善則伐者惡矣凡書救者未

有不善之也書狄救齊者許狄也許之曷為不稱人深著列國諸侯之罪也凡伐者為客受伐者為主今齊人受伐以宋為主者曲在宋也凡師直為壯曲為老書齊師敗績者責齊臣也或曰桓公管仲嘗屬孝

公於宋襄公以為世子矣則何以不可立乎曰不能制命雖天王欲撫鄭伯以從楚春秋猶以大義裁之而不與也桓公君臣乃欲以私愛亂長幼之節其可哉獨不見宣王與仲山甫爭魯侯戲括之事其後如

之何也春秋深罪宋公大義明矣

集說

呂氏大圭曰桓公舍當立而屬公子昭于宋不可謂之正又蔽於雍巫之言而許立無虧不可

謂之明身死之後豎刁易牙立公子無虧其名則立長也宋襄伐喪而納公子昭其名則桓公之所屬也彼此交爭國內大亂凡皆桓公之為也春秋不書昭之當立與否而但書其戰伐敗救之事其義深矣趙氏鵬飛曰齊立無虧義也宋納孝公非義也二者曲直已判然救無虧而無虧殺納孝公而孝公立則安在夫義也蓋義不在乎勝敗之間公義而敗其義固存也不義而勝義且安在哉聖人不以勝敗為褒



貶而以公義定邪正故內書救而狄亦書救 吳氏  
澂曰書師救齊於伐齊之後則救者救無虧也書狄  
救齊於齊師敗績之後時無虧已死齊無君矣故杜  
氏云救四公子之徒雖緩不及事然亦書救終善之  
也

# 秋八月丁亥葬齊桓公

## 左傳

秋八月葬齊桓公

## 胡傳

桓公九合諸侯不以兵車威令加乎四海幾於  
改物雖名方伯實行天子之事然而不能慎終

如始付託非人桓方在殯四鄰謀動其國家而莫之  
恤至於九月而後葬以此見功利之在人淺矣春秋  
明道正義不急近功不規小利於齊桓  
晉文之事有所貶而無過褒以此

集說

杜氏預曰孝公立而後得葬張氏洽曰杜氏注十一月而葬亂故也八月無丁亥日誤桓公

自入國以來急於功利志於富強其處已待人皆不以正心正家為務肉未及寒而庶孽爭國宋伐其喪冢子見殺國幾於亡足以見霸者功烈之卑聖門不道之實矣趙氏與權曰五伯桓公為盛葬不及期何哉管仲既死而豎貂易牙乘時用事使桓公不能保其子以此見閭寺之為人國家害甚矣

冬邢人狄人伐衛

狄始書人

左傳

冬邢人狄人伐衛圍菟圃衛侯以國讓其父兄子弟及朝衆曰苟能治之燬請從焉衆不可而

後師於訾婁狄師還

訾婁杜注衛邑今直隸大名府滑縣西南六十里有訾婁城與長垣縣接界

穀梁

狄其稱人何也善累而後進之伐衛所以救齊也

胡傳

狄稱人進之也以夷狄伐衛而進之可乎伐衛所以救齊也衛嘗亡滅東徙渡河無所控告齊

桓公封之使衛國忘亡誰之賜也桓公方沒不念舊德遽伐其喪亦大甚矣以直報怨聖人之公也以怨報怨天下之私也以德報怨寬身之仁也以怨報德刑戮之民也至是人理亡矣書狄救齊以著諸侯之罪書狄人伐衛以見救齊之善

集說

劉氏敞曰詩云駢駢角弓偏其反矣兄弟昏姻無胥遠矣爾之遠矣民胥然矣邢棄兄弟之親

而從狄其為反也不已甚乎使衛怨之卒以滅國其為然也不已信乎召穆公有言兄弟鬩于牆外禦其侮如是則雖鬩猶禦其外矣奈何而內侮哉孫氏覺曰衛嘗見滅於狄而齊桓封之桓死未踰年而衛

與諸侯伐之邢自以復存者桓公也於是而不忍齊之見伐而衛之無恩也與狄人伐之張氏洽曰邢黨狄以伐衛然論其曲直則衛之忘恩背伯以伐喪奪長宜得聲罪致討之師故人狄以進之見罪衛之深也吳氏澂曰其後衛竟滅邢其怨讎未必不基於此李氏廉曰衛之伐齊正與鄭伯逃歸事同鄭知有天王之命而不知世子之不可易衛知有桓公之命而不知長子之不可奪衛文賢君原其心恐非有背恩之實也但不審於義爾春秋於立孝公之事主宋以戰齊人狄以伐衛皆變文以顯之正以宋公此舉似義而實非義爾若止責其不能報德安知衛人不自以為報齊乎

案穀梁以書人為善救齊胡傳從之今主是說惟劉氏敞引角弓之義責邢今附存之蓋衛雖可伐而邢與衛親不當連狄以伐之也然則狄稱人奈何趙氏鵬飛曰狄書人便文爾如襄五年戚之會書吳人鄫

人蓋不可曰吳鄫人也故十四年向之會復書吳而已今狄與邢伐衛書人至二十一年狄獨伐衛則復書狄而已

庚襄王十有九年宋襄十年齊孝二年晉惠十年衛文十九年蔡莊五年鄭文三十二年

年曹共十二年陳穆七年杞成十四年秦穆十九年楚成三十一年

春

附錄左傳

梁伯益其國而不能實也命曰新里秦取之十九年春遂城而居之

王三月宋人執滕子嬰齊

左傳

宋人執滕宣公

集說

啖氏助曰春秋時以強暴弱故執諸侯皆稱人

亂辭也趙氏匡曰被執失地則名不然則否

孫氏復曰宋人執滕子嬰齊不得其罪也滕子名者惡遂失國也劉氏敞曰杜云稱人執者宋以罪

及民告非也宋為無道誣人之君以告諸侯而春秋不為辨則是春秋同其惡也若從赴者而書之不擇

真偽焉又何以為孔子又曰傳例不以名為義書名及不書名皆從赴亦非也案穀伯綏來朝鄧侯吾離

來朝傳曰名賤之也衛侯燬滅邢傳曰同姓故名尋此二者傳亦以名為義也記事駁雜是非混淆例不

能推此傳之大病孫氏覺曰滕固有罪矣宋襄公藉齊桓之後非有德義以服諸侯肆己之強一會虐

二君所以陵鑠諸夏故書人以貶之春秋不以不正治不正所以人宋而名滕子也薛氏季宣曰宋襄執

滕子以威求伯也陳氏傳良曰執不言歸未失國之辭也言歸危不得歸也是故執君不名歸然後名

之執稱曹伯歸稱曹伯襄執稱衛侯歸稱衛侯鄭此  
執也則其名何遂失國也虞公失國則其不名何也  
虞自亡矣晉人之罪徒執其君焉爾不於執焉加以  
遂失國之辭所以見虞之自亡也 家氏鉉翁曰宋  
襄踵齊桓行事當請命天子號召四方同獎王室今  
執滕子與是秋圍曹皆不待王命春秋所貶也 吳  
氏澂曰宋襄志在繼齊桓之伯然去春首伐齊喪奉  
少以篡長今春首執滕子恃彊而凌弱如此欲伯得  
乎蓋以滕子又不與齊盟故執之以威諸侯然非有  
德義以服人心肆已之暴所以終於無成也 程氏  
端學曰出乎爾者反乎爾故楚人效尤而執宋公矣  
汪氏克寬曰經書執國君者十有三惟成十五年  
晉侯執曹伯執得其罪又歸諸京師故以伯討與之  
餘皆書人悉非伯討也 余氏光曰郝氏曰滕小國  
也書執惡宋也宋襄行誼未著竊竊然自大  
以求諸侯侮弱為彊諸侯所以愈不附矣

案胡傳謂齊桓之盛九合諸侯而滕不與及宋襄繼起又不尊事大國其見執則有由矣書名著其罪也此說非也齊桓創霸自北杏以後衣裳兵車會盟之事屢矣大國如秦晉小國如薛莒杞鄆蕭宿小邾之屬皆未嘗與何得以不會獨責一滕耶至謂宋襄繼起又不尊事大國則傳無事蹟亦為臆揣之見未可據也然則滕子何以名禮所謂諸侯不生名失地則名也必欲別求其罪則諸侯被執者十有三若鄭之從楚莒之病魯罪皆浮於滕而何以皆不名耶惟陳氏傳良深得聖人之意其用胡傳罪滕之說者皆不錄

夏六月宋公曹人邾人盟于曹南

宋公作人

集說

杜氏預曰曹雖與盟而猶不服不肯致餼無地主之禮故不以國地而曰曹南所以及秋而見



圍 范氏甯曰曹南曹之南鄙 杜氏諤曰公羊宋  
稱人誤 黃氏仲炎曰北杏之會齊伯之首事也雖

人心始疑於齊然所致者猶有四國也今宋襄圖伯  
為盟於曹國之南是不能致曹而乃枉駕以盟曹也  
曹弱於宋而鄰於宋者猶且不服況諸侯乎故曹南  
之盟所與偕者僅一邾人而已寡助如此而以求伯  
是亡舟楫而涉不測之淵未有不死於溺者也 趙  
氏鵬飛曰君子有為善之心聖人不沮也齊桓有圖  
伯之心宋襄亦有圖伯之心故北杏之會諸侯皆人  
齊獨書爵曹南之盟二國皆人宋獨書公不予之於  
始無以責其終獨觀其所以副聖人之責者何如爾  
予桓公於始而終成九合諸侯之功予宋公於始而  
終為天下之辱聖人亦即其功罪而誅賞之以示勸  
懲於天下後世子之所以責之也 家氏鉉翁曰宋  
公書爵子之以伯乎曰望之也非子之也桓公既沒  
天下不可無伯也 李氏廉曰宋公書爵屬辭疑於

北杏陳氏以為明年鹿上復人宋則春秋未嘗予宋以伯此乃人曹邾以人宋也恐未必然蓋春秋始則望宋之能伯而予之繼則罪宋之失德而人之有何不可陳氏際泰曰五伯莫微於宋襄亦莫暴於宋襄未伯而先伐齊喪圖伯而執滕君既伯而用鄆子

# 鄆子會盟于邾

## 公羊

其言會盟何後會也

## 集說

杜氏預曰不及曹南之盟諸侯既罷鄆子乃會之於邾故不言如會孔氏穎達曰鄆子本意

欲往會盟未至於曹諸侯已去其實至於邾國故書會盟于邾二十八年踐土盟下云陳侯如會彼謂往至會所此不至會所故書其所至而不言如會襄七年鄆之會下鄭伯髡頑如會未見諸侯丙戌卒于鄆

亦不至會所而云如會者其意欲會而在道身喪故亦書其所至義與此同但卒執事異故文異耳李氏廉曰春秋諸侯會盟而後至者四此年鄆子會盟踐土陳侯如會雞澤陳袁僑如會于鄆鄭伯髡頑如會是也

## 已酉邾人執鄆子用之

左傳

夏宋公使邾文公用鄆子於次睢之社欲以屬東夷司馬子魚曰古者六畜不相為用小事不

用大牲而況敢用人乎祭祀以為人也民神之主也用人其誰饗之齊桓公存三亡國以屬諸侯義士猶曰薄德今一會而虐二國之君又用諸淫昏之鬼將以求霸不亦難乎得死為幸

次睢杜注睢水次有妖神人皆祀之後漢臨沂有叢亭博物記曰即次睢之社今在山東兗州府沂

境州

公羊

惡乎用之之用之社也其用之社奈何蓋叩其鼻以血社也

穀梁

微國之君因邾以求與之盟人因已以求與之盟已迎而執之惡之也用之者叩其鼻以求與之

也

集說

何氏休曰惡無道也不言社者本無用人之道言用之已重矣故絕其所用處也杜氏預曰

鄫雖失大國會盟之信然宋用之為罰已虐故直書用之不書宋使邾而以邾自用為文南面之君善惡自專不得託之於他命孔氏穎達曰昭十一年楚執蔡世子友用之與此執鄫子用之皆惡其無道直書用之言其若用畜牲所以惡楚宋也楊氏士勳曰叩其鼻者論語云以杖叩其脛則叩謂擊也高

氏聞曰宋公之盟曹南怒鄆子不至故欲用之而子  
魚諫焉邾人修鄆舊怨遂承其意執而用之也不然  
則宋修伯業邾從宋盟安敢輒戮鄆而不懼討乎宋  
既不討則意從可知矣宋襄圖伯而縱容同盟暴虐  
與國何以求諸侯乎經書鄆子與蔡世子有皆曰用  
之而不書所用之迹蓋聖人所不忍言但曰用之則  
知其以人為用也諸侯終則名鄆子不名史佚之  
張氏洽曰鄆子會曹南之盟而後期宋公使邾執之  
邾鄆世讎因附勢而肆虐用之惡也觀後日戕鄆子  
亦出於邾則邾之虐鄆必自用鄆子而天子不誅所  
以復出為惡與趙氏鵬飛曰用鄆子者宋公意也  
然不書使之者宋以意諭之而用之之際宋公不在  
也故以邾用之為文吳氏澂曰用之者殺之而用  
其尸為牲以祀神李氏廉曰執鄆子說左氏以為  
宋公使邾執之若然春秋何以不蔽罪於宋何休以  
為魯本許嫁季姬於邾季姬淫佚使鄆子請已以此

二國致忿臨江劉氏亦信其說而考之公羊傳文本無此言不知何氏何據大抵邾與宋皆南面之君亦可以不受其命而乃迎逢其惡躬為戎首肆行暴虐春秋舍宋而罪邾亦未為過也汪氏克寬曰邾子稱人貶也上言會盟于邾則非微者明矣

# 秋宋人圍曹

左傳宋人圍曹討不服也子魚言於宋公曰文王聞崇德亂而伐之軍三旬而不降退修教而復伐之因壘而降詩曰刑于寡妻至于兄弟以御于家邦今君德無乃猶有所闕而以伐人若之何盍姑內省德乎無闕而後動

胡傳

盟于曹南口血未乾今復圍曹者討不服也愛人不親反其仁治人不治反其智襄公不能內

自省德而急於合諸侯執嬰齊非伯討不足以示威盟曹南非同志不足以示信卒於兵敗身傷不知反求諸已欲速見小利之過也

集說

杜氏預曰曹雖與盟而猶不服陳氏傳良曰此宋公也其稱人何凡圍國雖君將貶人之前

年齊桓卒宋公欲合諸侯而亟修怨於曹諸夏之書圍國自此始張氏洽曰討不服也夫近者說遠者

來齊桓之伯屈意去忿盟魯平宋以致諸侯先近故也今襄公欲圖諸侯近於宋者莫如曹滕滕既執矣

曹方與盟已而復叛不從子魚內省德之言而亟事干戈故胡氏以為欲速見小利之過宜其不遂伯也

吳氏澂曰宋襄以威迫曹而與之盟故曹不心服汪氏克寬曰襄公志在近小非特不能成大功雖

小利亦未嘗遂僅一盟曹南而曹不服再盟鹿上會孟而束手就擒於荆蠻矣又曰經書加兵於曹者十

有三而宋居其七焉蓋自僖十五年間曹之以兵佐齊桓而伐之至此憤其貳乃環其國都而攻之宣三年復圍之哀之三年六年樂髡向巢再伐七年又圍之八年遂入而俘其君終滅其國比事考之不貶而罪自見矣

# 衛人伐邢

左傳

秋衛人伐邢以報菟園之役

集說

陸氏淳曰左氏曰於是衛大旱卜有事於山川不吉甯莊子曰昔周饑克殷而年豐今邢方無

道諸侯無伯天其或者欲使衛討邢乎從之師興而雨啖子曰邢之無道未應如紂衛侯之賢不可比於武王皆飾妄之辭也高氏閔曰衛不伐狄而伐邢是以人之張氏洽曰衛不自省其從宋伐喪之罪



而以報復為事罪之也。趙氏鵬飛曰：報伐衛也。俞氏皋曰：此報復之師也。而左氏以為天意師興而雨不亦誣哉！凡此之類，皆當據經。覈傳勿以為然可也。王氏樵曰：邢舍狄怨而從狄伐衛，衛舍狄怨而專伐邢，邢或被脅衛則肆忿也，其惡大矣。王氏錫爵曰：甯莊子語不可為致雨之常法。

# 冬會陳人蔡人楚人鄭人盟于齊

公作公會  
楚始與齊盟

## 左傳

陳穆公請修好於諸侯以無忘齊桓之德冬盟于齊修桓公之好也

## 胡傳

盟會皆君之禮也微者盟會不志於春秋凡所志者必有君與貴大夫居其間也然則為此盟

者乃公與陳蔡楚鄭之君或其大夫矣曷為內則沒公外則人諸侯與其大夫諱是盟也莊公十年荆敗蔡師始見於經其後入蔡伐鄭皆以號舉僖公元年改而稱楚經亦書人於是乎浸彊矣然終桓公世皆

止書人以齊修伯業能制其疆故也桓公既沒鄭伯首朝於楚其後遂為此盟故春秋沒公人陳蔡諸侯而以鄭列其下蓋深罪之也又二年復盟于鹿上至會于孟遂執宋公以伐宋而楚於是乎大張列位於陳蔡之上而書爵矣聖人書此豈與之乎所以惡諸侯之失道謹盟會之始也

集說

杜氏預曰地於齊齊亦與盟陳氏傳良曰內不言公諱之也以其人楚不可不人陳蔡以其

人陳蔡不可以不沒公也張氏洽曰楚欲得志於天下久矣齊桓討而攘之其後桓志稍衰滅黃敗徐駸駸抗衡然尚有所懼也桓公既沒宋襄欲圖伯而諸侯不服故楚假不忘桓德之說求參與列國之盟會陳蔡及鄭皆近楚而素服之者故先受其謀齊孝公親見其父極力攘楚聽其甘言納之國都而與盟僖公亦忘是懲之志偕之同歆楚因是以行其志春秋諱公而人諸侯所以謹其始也汪氏克寬曰于

齊之盟魯及諸侯盟楚之始也故皆以微者書而深貶之會孟盟薄盟宋楚之始也故皆以微者書而深貶之會孟盟薄盟宋直書不諱又所以著其陵駕諸侯之暴而諸侯皆俛焉從之也幸而晉文城濮之捷得以却其方張之勢晉伯不振而楚莊竊討賊之義盟于辰陵遂主諸侯于蜀之盟十有一國之大夫皆貶書人魯不諱公視盟齊雖若未減然人諸國大夫乃所以人公也厥後于宋于虢晉楚狎主齊盟而于申十有三國且用齊桓召陵之禮春秋欲諱之而有不勝諱矣是知春秋貶于齊之盟所以謹禮於微慮患於早也王氏樵曰齊桓仗義以伐楚屈完來盟于師未嘗引楚而內之也內楚而列於齊盟自此會始或者皆知合南北之成自向戌始而不知此會已為之權輿矣陳合齊楚之成而楚執宋公宋合晉楚之成而楚爭為長楚人衷甲寇不可啓漸不可長此之謂也卓氏爾康曰先陳主是盟也鄭後楚何也桓公沒鄭首朝於楚

鄭為楚私不可不後楚也陳蔡故從楚者也先陳蔡為正其體也鄭新服楚者也後鄭正其罪也皆特筆也陳氏際泰曰首伐伯主者宋也即其圖伯者也首即楚盟者齊也即其伐楚者也

# 梁亡

左傳梁亡不書其主自取之也初梁伯好土功亟城而弗處民罷而弗堪則曰某寇將至乃溝公宮

曰秦將襲我民懼而潰秦遂取梁

## 公羊

此未有伐者其言梁亡何自亡也其自亡奈何魚爛而亡也

## 穀梁

自亡也湏於酒淫於色心昏耳目塞上無正長之治大臣背叛民為寇盜梁亡自亡也如加力

役焉湏不足道也梁亡鄭棄其師我無加損焉正名而已矣梁亡出惡正也鄭棄其師惡其長也

胡傳

陸淳曰秦肆其暴取人之國沒而不書其義安在曰乘人之危惡易見也滅人之國罪易知也

自取亡滅者其事微矣春秋之作聖人所以明微也梁本侯國魚爛而亡何哉易曰天行健君子以自強不息古者諸侯朝修其禁令晝考其國職夕省其典刑夜儆其百工無使愒淫而後即安故克勤于邦荒度土功者禹也慄慄危懼檢身若不及者湯也自朝至于日中昃不遑暇食用咸和萬民者文王也凡有國家者土地雖廣人民雖衆兵甲雖多城郭雖固而不能自彊於政治則日危月削如火銷膏以至滅亡而莫覺也而況好土功輕民力湏於酒淫於色心昏而出惡政者乎其亡可立而待矣

集說

何氏休曰梁君隆刑峻法一家犯罪四家坐之一國之中無不被刑者百姓一旦相率俱去狀

若魚爛魚爛從內發故云爾

文非取者之罪所以惡梁孔氏穎達曰以自亡為

自亡者所以深惡梁爾非言秦得滅人國也孫氏復曰梁亡惡不用賢也梁伯守天子土有宗廟社稷之重有軍旅民人之衆左右前後朝夕與為治莫有聞者是左右前後皆非其人也左右前後皆非其人  
不亡何待故直曰梁亡以惡之張氏洽曰春秋變法以書諸侯自取滅亡者有二晉人執虞公猶言兵已加於頸而不自知也梁亡言國自亡而不之覺也黃氏仲炎曰民罷而潰則國已亡矣國亡而後秦取其地非因秦取之而後亡也故春秋不得言秦取而以自亡為文焉明自亡者民亡之也

辛襄王十  
已二年

二十年

宋襄十一年齊孝三年晉惠十一年  
衛文二十年蔡莊六年鄭文三十三

年曹共十三年陳穆八年杞成十  
五年秦穆二十年楚成三十二年

春新作南門

左傳

書不時也凡啓塞從時

公羊

何以書譏何譏爾門有古常也

穀梁

作為也有加其度也言新有故也非作也南門者法門也

胡傳

書新作南門譏用民力於所不當為也魯人為長府閼子騫曰仍舊貫如之何何必改作孔子

曰夫人不言言必有中春秋凡用民力得其時制者猶書於策以見勞民為重事而況輕用於所不當為者乎然僖公嘗修泮宮復閼宮矣奚斯董其役史克頌其事而經不書者宮廟以事其祖考學校以教國之子弟二者為國之先務雖用民力不可廢也其垂教之意深矣

集說

何氏休曰惡奢泰不奉古制常法孫氏復曰城郭門戶皆有舊制壞則修之常事書者譏其

侈泰妨農功改舊制也案莊二十九年春新延廢不言作此言作改舊制可知也劉氏敞曰其謂南門

何南非一門也庫門天子皋門雉門天子應門南門

者天子之門非諸侯之門也天子諸侯皆南面而聽

政門必嚮南其來舊矣新其舊而書新作是必有僭

制焉南門之僭自僖公始罪其不可為而為故曰新

作二百四十二年所興作多矣不必書也僖公修泮

宮詩人頌之而春秋不書泮宮諸侯之學僖公修之

得其時制故不書新宮災大室屋壞災與壞不能不

修而經無修之文雉門及兩觀災記新作焉吾以此

數者參之修舊不足書其書者皆非禮之制也王

氏葆曰顧命孔氏傳南門路寢門則知魯南門乃路

門也魯庫雉二門既用天子之制惟路門仍舊故僖

公因其弊而斥大之高氏閌曰改舊制而增大之

罪不止於勞民而已李氏廉曰經書新作二此年

及定二年新作雉門及兩觀汪氏克寬曰僖公之



經竝無城築土功之事則庶幾其能愛民矣而猶有南門之役且不免於過制而僭上春秋特書新作以譏之抑責備賢者之意歟湛氏若水曰孔子曰節用而愛人使民以時於春為不時於作為不節

## 夏部子來朝

集說

孔氏穎達曰二十四年傳富辰所云部之初封文王之子聃季之弟以後更無所聞唯此年一

見而已無時君謚號不知誰滅之劉氏敞曰公羊云失地之君非也若失地之君何得言來朝朝者施於有國有家之辭爾又公羊以部滅在春秋前案春秋以來且九十年矣部子失地殆三世矣猶能自歸同姓躬行朝禮乎鄭氏樵曰部有二桓二年取部大鼎北部也在單州成武部子來朝南部也單州有二部城李氏廉曰何氏特據部大鼎之文以為春秋前宋已滅部此無據之言也不可取然部惟此處

一見他無所考 黃氏正憲曰王氏云部分為南北皆附庸於宋意是時宋襄無道荆楚日強部以宋為難恃而魯為同姓望國故來朝以求依附耶

# 五月乙巳西宮災

公羊

西宮者何小寢也小寢則曷為謂之西宮有西宮則有東宮矣魯子曰以有西宮亦知諸侯之

有三宮也西宮災何以書記異也

集說

何氏休曰禮夫人居中宮少在前右媵居西宮左媵居東宮少在後孔氏穎達曰穀梁以西

宮為閔公之廟禮宗廟在左不得稱西宮也孫氏覺曰西宮僖公所居之西宮以其在西故云西爾公羊曰有西宮則有東宮此說是也穀梁以為閔宮案僖公繼閔而立若實閔公何妨言新宮乎為其已久

何妨言閔宮乎 張氏洽曰薛氏曰西宮魯之貳室也 家氏鉉翁曰公羊曰小寢也小寢燕私之地人君之過嘗在深宮燕處之際天之示譴豈徒然哉其後魯僖沒於小寢

## 鄭人入滑

左傳

滑人叛鄭而服於衛夏鄭公子士洩堵寇帥師入滑

集說

王氏葆曰滑與鄭為鄰齊桓時嘗與鄭同盟幽今列國無霸鄭首從楚遣二卿長驅而入滑無

忌憚甚矣故略而人之 高氏閔曰鄭伯與滑伯同等諸侯滑服於衛遽興師而入其國必欲滑為已屬蓋強之凌弱如此 張氏洽曰此記天王出居于鄭之始釁也 家氏鉉翁曰宋襄欲霸諸侯擅兵相侵者告於王而懲之如鄭人入滑當先糾者也 舍是弗為烏能有成

# 秋齊人狄人盟于邢

左傳

齊狄盟于邢為邢謀衛難也於是衛方病邢

穀梁

邢為主焉爾邢小其為主何也其為主乎救齊

集說

張氏洽曰書狄例以國稱而同之於齊稱人之列者昔宋伐齊喪而能救之今衛欲滅邢而狄

能謀之故人以進之人狄則罪衛之意明矣此見聖人仁天下之公心也季氏本曰前年衛從宋伐齊

邢狄同救而去年衛遂伐邢此齊狄所以至邢而盟也

案左傳以為謀衛難穀梁以為主救齊說若不同而其實一也衛方病邢故齊狄盟邢以謀之而衛之所以病邢者以其救齊也宋衛伐齊之喪邢援狄以救之是救齊之役邢主之也故曰邢為主

# 冬楚人伐隨

左傳

隨以漢東諸侯叛楚冬楚鬬穀於菟帥師伐隨取成而還君子曰隨之見伐不量力也量力而

動其過鮮矣善敗由已而由人乎哉詩曰豈不夙夜謂行多露

穀梁

隨國也

集說

許氏翰曰楚既服隨則將爭衡於上國而宋欲盟之其能屈乎高氏閌曰隨自是服屬於楚

至哀元年會楚子圍蔡李氏廉曰隨本漢東姬姓國桓公六年楚武王侵隨鬬伯比曰漢東之國隨為

大吾不得志於漢東也我則使然我張吾三軍而被吾甲兵以武臨之彼則懼而協以謀我故難間也想此時隨尚能率小國以拒楚而漢陽諸姬尚聽命於隨也八年而敗隨于速杞十一年而隨絞州蓼又欲

伐楚師卒以鄭師之敗而止至莊四年楚武王荆尸授師以伐隨其年楚子卒隨人成楚文即位不復有事於隨蓋隨已屈服於楚也然自莊以前楚兵加於江漢之間皆不經見蓋未有告命也今齊桓既卒諸侯無伯於齊之後遂為同盟之國於是假告慶之策書以為恐動諸侯之計矣

附錄左傳

宋襄公欲合諸侯臧文仲聞之曰以欲從人則可以人從欲鮮濟曰

壬襄王十午三年

二十有一年

宋襄十二年齊孝四年晉惠十二年衛文二十一年蔡莊七年

鄭文三十四年曹共十四年陳穆九年杞成十六年秦穆二十一年楚成三十三年

春秋侵衛

集說

杜氏預曰為邢故張氏洽曰因邢之盟也孝公不能嗣父之業楚狄皆因之以為患此齊邢

之盟所以兩書而邢衛竝受其禍也吳氏澂曰狄因宋曹衛邾伐齊喪則仗義興師以救齊又聲衛伐喪之罪而與邢協力以伐衛衛因邢之黨狄伐已而伐邢以報怨且憾邢未已則狄又援齊而盟以為邢謀至此遂為邢而侵衛前之伐以衛伐喪之惡有罪可數故稱伐今之侵以衛有滅邢之心無事可指故稱侵侵者言其師之無名也伐衛盟邢與邢齊竝序則稱人此獨侵衛則止稱狄

宋人齊人楚人盟于鹿上

鹿上杜注宋地汝陰有原鹿縣今江南鳳陽府潁州太和

縣西有原鹿城

左傳

春宋人為鹿上之盟以求諸侯於楚楚人許之公子目夷曰小國爭盟禍也宋其亡乎幸而後

敗

集說

杜氏預曰宋為盟主故在齊人上胡氏寧曰鹿上之盟是宋公也何以稱人齊桓攘楚以安

列國宋公盟楚以求諸侯張氏洽曰伯天下者宋之欲也亂天下者楚之欲也欲伯天下而求之於楚

與之同盟此春秋所以列序而人之以著襄公之自取敗辱也趙氏鵬飛曰愚哉宋襄之圖伯也齊桓

之興協比諸侯輯寧東夏垂二十年内外無患小大一德而後敢問包茅之貢於楚故能一舉而屈之今

襄以子然之宋執滕子虐鄆君賈怨於曹結憾於魯諸侯無小大皆哆然外之獨齊孝以其納已之故不

得已而從焉然前冬蓋亦同楚人之盟矣保其無二心於宋哉乃一旦會楚人於鹿上之盟欲以隻牲尺

書服虎狼之楚吾於是知其大愚而不移蹈死地而不恐者也吳氏澂曰宋襄欲圖伯合諸侯而德義

不足以感人曹南之盟僅能脅服至近之曹至小之邾其餘諸侯更無從之者況曹復懷貳楚人亦乘間



合諸侯而其勢力足以威人齊之盟不特陳蔡鄭從之而魯亦從之此宋襄所願欲而不可得者故求之於楚欲借楚之令使諸侯從已是求肉於虎其遭執辱也宜哉楚君既稱人則齊宋二君亦降稱人若宋齊稱爵則疑楚人為大夫矣

## 夏大旱

**左傳** 公欲焚巫尪臧文仲曰非旱備也修城郭貶食省用務穡勸分此其務也巫尪何為天欲殺之則如勿生若能為旱焚之滋甚公從之是歲也饑而不害

**公羊** 何以書記災也

**集說** 杜氏預曰雩不獲雨故書旱 孔氏穎達曰春秋之例旱則修雩雩必為旱而經或書雩或書旱

旱者雩而得雨喜雩有益書雩不書旱雩不得雨則書旱明災成此時雩不獲雨故書旱也杜氏諤曰春秋書大旱者二此年及宣七年是也皇極不立五事不正而答應之詳記災變所以示戒也高氏閌曰言大者久且甚之辭黃氏仲炎曰春秋或言不雨或言旱或言大旱何也不雨之害比旱為輕大旱之害比旱為重也汪氏克寬曰春秋歷時不雨則書不雨但一時不雨而為災則書旱莊三十一年冬不雨不曰旱者五穀既登則害於民者淺故不書旱爾

案穀梁以旱時為正楊氏因謂旱必歷時非一月之事此說非也經書夏大旱者直據其旱之時而記之爾豈必以為旱當書時乎假使大旱在兩時之際或不止於一時聖人將何以書之也

秋宋公楚子陳侯蔡侯鄭伯許男曹伯會于孟執宋公

以伐宋

孟公作霍穀作雱或為宇  
孟杜注宋地今河南歸德府睢州有孟亭

楚始稱子

左傳

秋諸侯會宋公于孟子魚曰禍其在此乎君欲已甚其何以堪之於是楚執宋公以伐宋

穀梁

以重辭也

胡傳

執宋公者楚子也何以不言楚子執之分惡於諸侯也諸侯皆在會拱手以聽而莫之敢違其

不勇於為義亦甚矣故特列楚子於陳蔡之上而以同執為文夫以楚之強豈能勝秦五國之衆何弱於趙然澠池之會藺相如一奮其氣威信敵國秦雖虎狼猶不敢動況以五國之君而不能得志於荆楚乎宋以乘車之會往而楚伏兵車以執之則宋直楚曲其義已明雖以匹夫自反而縮猶不可恥矧南面之君也哉然春秋為賢者諱宋公見執不少隱之何也夫盟主者所以合天下之諸侯攘荆楚尊王室者也

宋公欲繼齊桓之烈而與楚盟會豈尊王室之義乎  
故人宋公於鹿上之盟而孟之會直書其事而不隱  
貶之也所以深

集說

范氏甯曰傳例曰以者不以者也此傳及定七  
年齊人執衛行人北宮結以侵衛傳皆曰以重

辭也

然則以有二義矣國之所重故曰重辭趙氏  
匡曰此楚執爾其以諸侯執之之辭何也譏諸侯也

南面之君兵馬非不多也力非不足也而聽荆楚執  
辱盟主故譏之宋公德不足懷慮不及遠而求諸侯

以及於難故罪之

葉氏夢得曰楚子何以先諸侯  
宋襄欲圖伯而會楚子諸侯推先楚子也張氏洽

曰襄公非但不識楚人譎詐之心且無以知五國之  
不同心而輕為是會也愎諫求欲以及於禍所謂愚

而好自用者宋襄之謂與趙氏鵬飛曰宋襄所恃  
者有恩於齊而已前日鹿上之盟幸脫虎口者以齊

在也今齊懼楚而不至陳蔡鄭許皆楚之黨而曹又  
宋之讎也見執固無疑矣家氏鉉翁曰宋未能伯  
而鹿盟孟會序宋為首無乃紊名實乎曰自齊而降  
皆俯首帖耳不以為恥不出楚下者惟襄公耳顛沛  
百罹繼之以死夫子列齊楚之上與其有志也吳  
氏澂曰宋襄求諸侯於楚而楚許之故為此會以合  
所求之諸侯也當時楚最强盛諸侯服之宋則國弱  
而諸侯不從故求於楚宋為首事故先之然能致諸  
侯之來者實楚也楚以子爵而序於侯伯之上則此  
會楚為主故宋公之執不待言楚而知其為楚矣  
諸侯聽其執而莫之救諫者勢不能也案前有鹿上  
之盟後有使宜申來獻捷之事楚君皆稱楚人獨此  
稱楚子者蓋謂執宋公不可稱執宋人宋公既爵則  
陳蔡鄭許曹皆須爵否則疑若君與大夫會五國既  
稱爵則楚不得不稱爵此春秋之筆也汪氏克寬  
曰以上公之尊同於匹夫之微俯就執辱宋襄之圖

伯末矣齊之盟楚序陳蔡之下鹿上之盟楚序齊下  
蓋荆楚雖強初與盟猶未敢偃然自肆也至是列陳  
蔡之上蓋有主會之志矣而宋襄德寡國弱欲尸盟  
主之權故楚顧設詐擒之而攻其國以取威攘伯也  
于齊鹿上楚皆書人此會書楚人則疑非楚君故昉  
書楚子以子爵亞於宋公而位列國諸侯之上則兩  
伯之仇不待春秋之終而已見矣金氏賢曰序楚  
子於上者著其強也列諸侯於下者卑其弱也宋公  
見執而不諱者惡其德衰也湛氏若水曰  
宋公不智楚不義五國之君不勇交譏之  
案楚執宋公不書楚子者趙氏匡以為譏諸侯胡傳  
因之其說較公羊為勝蓋宋公被執五國坐視而不  
救故春秋以同執之辭書之也若楚  
之挾詐攘伯則不待貶而自見矣

冬公伐邾

左傳

任宿須句顓臾風姓也實司大皞與有濟之祀以服事諸夏邾人滅須句須句子來奔因成風

也成風為之言於公曰崇明祀保小寡周禮也蠻夷猾夏周禍也若封須句是崇皞濟而修祀紓禍也

任杜注任城縣也今為濟寧州屬山東兗州府須句杜注在東平須昌縣西北今兗州府東平州

東南有須句故城 顓臾杜注在泰山南武陽縣東北今兗州府費縣西北八十里有顓臾城

集說

呂氏本中曰成風之言一則曰周禮再則曰周禍夫周禮之說仲孫湫韓宣子知之者代不乏

人至周禍之說則春秋二百四十二年之間諸侯皆不能知知之者成風一人而已彼蓋以通天下皆周也魯乃周之魯也須句乃周之須句也邾為不道剪滅周之須句則為周之魯者安得不亟救之耶王

氏葆曰大旱經時不知貶食省用而用兵伐人非其道也

# 楚人使宜申來獻捷

公羊

此楚子也其稱人何貶曷為貶為執宋公貶宋公與楚子期以乘車之會公

子目夷諫曰楚彊而無義請君以兵車之會往宋公曰不可吾與之約以乘車之會自我為之自我墮之曰不可終以乘車之會往楚人果伏兵車執宋公以伐宋宋公謂公子目夷曰子歸守國矣國子之國也吾不從子之言以至此乎公子目夷復曰君雖不言國國固臣之國也於是歸設守械而守國楚人謂宋人曰子不與我國吾將殺子君矣宋人應之曰吾賴社稷之神靈吾國已有君矣楚人知雖殺宋公猶不得宋國於是釋宋公宋公釋乎孰走之衛公子目夷復曰國為君守之君曷為不入然後逆襄公歸惡乎捷捷乎宋曷為不言捷乎宋為襄公諱也此圓辭也曷為不言其圍為公子目夷諱也



穀梁

捷軍得也其不曰宋捷何也不與楚捷於宋也

胡傳

不曰來獻宋捷為魯諱也諸侯從楚伐宋而魯獨不與故楚來獻捷以脅魯為魯計者拒其使

而不受可也請於天王而討之可也宋公先代之後作賓王家方修盟會而伏兵車執之於壇坫之上又以軍獲遺獻諸侯其橫逆甚矣拒其使而不受聲其罪而致討不患無辭魯於是時曾不能申大義以攘荆楚存宋國故不曰宋捷特為魯諱之也

集說

王氏沿曰宜申鬬氏子西也不書族與椒聘同劉氏啟曰楚欺詐諸侯執宋公而伐其國威

動天下然而自卑屈於魯使人獻捷在衆人之情皆榮之而春秋抑而不予也既貶其君又隱其捷乎宋以伸有道之弱而沮無道之勝也陳氏傳良曰君使大夫何以特稱人貶之也孟會稱子矣獻捷於魯

何以貶人之孟會不稱子無以見楚宋之爭長獻捷於魯不人之則是遂子楚也自是至椒之聘而後始有君大夫張氏洽曰來魯獻捷者僖公雖不與於孟之會而魯為列國中大邦楚方求駕列國故假宋捷以威魯也楚子稱人貶其詐以執宋公也上書諸侯執宋公而此書楚獻捷足以明楚之執矣逞其詐力而誇示於我僖公不能拒絕而受其使命待以賓禮特書來獻而不言宋為內諱也孟之會諸侯以同執示貶宜申之來魯以受捷諱惡或抑或揚婉而成章此之謂也趙氏鵬飛曰聖人於楚前書爵而此書人奪其強也書捷不書宋不予楚之捷宋也然獻捷於魯魯亦恐矣故十二月遂從薄之盟吳氏澂曰楚人者楚子也稱使則知為楚子矣自屈完盟召陵楚臣之見經自是始李氏廉曰楚未有大夫而書屈完則屈完為褒辭楚已有君而書楚人則楚人為貶辭

十有二月癸丑公會諸侯盟于薄釋宋公

薄宋地漢置薄縣屬山陽

郡後漢改屬梁國今河南歸德府治西北有亳城即薄也

左傳

冬會于薄以釋之子魚曰禍猶未也未足以懲君

公羊

執未有言釋之者此其言釋之何公與為爾也公與為爾奈何公與議爾也

穀梁

會者外為主焉爾外釋不志此其志何也以公之與之盟也不言楚不與楚專釋也

胡傳

會不書其所為獨會于稷書成宋亂者為受部鼎立華督也會于澶淵言宋災故者為弇蔡侯

不討般也盟不書所為而盟于薄言釋宋公者宋方主會而荆楚執而伐之以其俘獲來遺是天下大變春秋之所謹也魯既不能申大義以抑其強暴而顧與歃血要言求楚子以釋之故書會書盟書釋皆不

言楚子為魯諱以深貶之也穀梁謂不與楚專釋是已或以為嘉我公之救患誤矣

集說

杜氏預曰公本無會期盟而往故書公會諸侯張氏洽曰宋襄公求諸侯於楚楚反以詐

執之諸侯若能使宋人征繕而修文告之詞明宋之直正楚之罪則楚人當義愧情屈而歸宋公之不暇矣今僖公脅於獻捷之威與五國為會求盟於楚以請宋公而後得釋正中楚人之詭計春秋不書會楚子而曰會諸侯亦不書宋公歸自楚而曰釋宋公蓋其執其釋皆制於楚故聖人諱之罪魯與諸侯之無能為也趙氏鵬飛曰執宋公楚子也春秋以諸侯共執之釋宋公亦楚子也春秋以諸侯共釋之雖執之釋之諸侯莫不與其謀而實制於楚也聖人不書楚書諸侯亦所以病諸侯矣凡諸侯執而反書歸而宋公書釋不書歸蓋歸者若自歸歸在我也釋者在彼釋之制在人也若曰諸侯不會則宋公不得釋也

此所以重楚之惡亦以病宋公也 李氏廉曰此會與僖二十七年公會諸侯盟于宋同皆書諸侯者避

會楚之嫌也不然只如鄫子會盟于邾可矣何必又書諸侯乎 汪氏克寬曰春秋書公會諸侯盟者二

盟于薄為宋請平于楚以釋其執盟于宋為宋請服于楚以釋其圍楚雖主盟而春秋皆書公會諸侯不

以伯權予楚也 邵氏寶曰宋微子之後天子客焉而膳且拜者也列國諸侯禮莫隆焉故春秋於其事

也必謹之于稷曰成宋亂于薄曰釋宋公于澶淵曰宋災故皆謹之之實也乃若其義則存乎其事焉爾

矣 卓氏爾康曰魯為望國楚欲借以號召天下孟之盟僖公與齊不與焉故使宜申獻捷脅而誘之僖

公畏楚之彊不得不來楚子既得盟魯即慨然釋宋公以見德於僖公蓋示已之有禮而堅魯之服從也

案諸侯見執而不失國者於歸名之書曰某侯某歸于某此不名而言釋先儒未有明言其義者惟蘇氏

轍云書曰歸于某而名則自名也書曰釋宋公而名則以諸侯名之也皆諸侯也而可以相名乎此說亦迂夫諸侯不生名雖見執而歸豈有自以其名赴於同列者以諸侯而釋諸侯亦未必以被執者之名赴於同列也然則宋公之釋而不名奈何曰曹襄衛鄭執於盟主故其歸也名之宋公執於荆楚故其釋也不名是則春秋之義也夫

癸襄王十未四年

二十有二年

宋襄十三年齊孝五年晉惠十三年衛文二十二年蔡莊八年

鄭文三十五年曹共十五年陳穆十年杞成十七年秦穆二十二年楚成三十四年

春公伐邾取須句

句其俱切  
公作句

左傳

伐邾取須句反其君焉禮也

胡傳

案左氏須句風姓實司太皞與有濟之祀邾人滅之須句子來奔因成風也公伐邾取須句而

反其君焉審如是固得崇明祀保小寡之禮何以書取乎不請於王命而專為母家報怨謀動干戈於邦內擅取人國而反其君是以亂易亂非所以為禮也與收奪者無以異矣

集說

杜氏預曰任宿須句顓臾皆伏羲之後封近於濟故世祀之須句雖列國而削弱為魯私屬若

顓臾之比故滅奔及反其君皆略不書趙氏匡曰取者收奪之名也高氏閔曰歸其君使為我附庸

也為我附庸則是我取之也陳氏傳良曰春秋嚴

義利之辨苟以為利一以取書之是故雖邾人滅須

句須句子來奔伐邾取須句反其君焉書取須句雖

莒著丘公立而不撫鄆鄆叛而來書取鄆張氏洽

曰僖公非有崇明祀保小寡之公心而徒徇母之私意故無以服邾而致升陞之寇春秋書之亦不異於

他日之伐取也趙氏恒曰既取其國而又反其君者取其國為附庸而反其君以不絕皞濟之祀也不絕其祀而不得謂之禮者以其不請於王命故也卓氏爾康曰須句為成風母家邾取而我伐之反地置君固其本心其以邾恃宋害鄆故乘宋公見執而伐之亦事勢當然趙氏以為須句邾邑則左氏所載豈盡無徵耶至文公七年又書伐邾取須句須句當復取於邾而文公又伐取爾

案須句為邾所滅公伐邾而反其君劉氏敞以經無明文遂疑左氏之妄趙氏鵬飛李氏廉汪氏克寬皆從之似亦有理然春秋事據左傳胡傳謂不稟王命專為母家報怨其義尤正故仍主二傳之說

## 夏宋公衛侯許男滕子伐鄭

左傳

三月鄭伯如楚夏宋公伐鄭子魚曰所謂禍在此矣



集說

杜氏預曰怒鄭如楚故伐之孫氏復曰鄭即楚故也案莊十六年荆伐鄭二十八年荆伐鄭

僖元年楚人伐鄭二年楚人侵鄭三年楚人伐鄭鄭不即楚此而即者齊桓既死宋襄不能與楚抗也

張氏洽曰襄公當困於楚矣疾疫雖甚而德慧術智未有以增益其所不能穀梁氏所謂不能反其知以

治人過而不改而又甚之者也趙氏鵬飛曰鄭人從楚力不支也宋不能抗楚而甘就執辱何以責鄭

之弱而附楚也家氏鉉翁曰三國不以宋公見執於楚猶從伐鄭問即楚之罪故爵之吳氏澂曰鄭

知宋伯不可成其力不可恃遂朝於楚宋公不自反以修己之德義乃遽怒鄭而興師以伐之所以挑楚

釁而取泓之敗也

附錄左傳

初平王之東遷也辛有適伊川見被髮而祭於野者曰不及百年此其戎乎其禮先

亡矣秋秦晉遷陸渾之戎於伊川晉太子圉為質於秦將逃歸謂嬴氏曰與子歸乎對曰子晉太子而辱於秦子之欲歸不亦宜乎寡君之使婢子侍執巾櫛以固子也從子而歸棄君命也不敢從亦不敢言逃逃歸富辰言於王曰請召大叔詩曰協比其鄰昏姻孔云吾兄弟之不協焉能怨諸侯之不睦王說王子帶自齊復歸於京師王召之也

伊川杜注周地伊水也

秋八月丁未及邾人戰于升陘

陘音刑升陘杜注魯地

左傳

邾人以須句故出師公卑邾不設備而禦之臧文仲曰國無小不可易也無備雖衆不可恃也

詩曰戰戰兢兢如臨深淵如履薄冰又曰敬之敬之天惟顯思命不易哉先王之明德猶無不難也無不

懼也況我小國乎君其無謂邾小蠶蠆有毒而況國乎弗聽八月丁未公及邾師戰于升陘我師敗績邾人獲公胄縣諸魚門

穀梁

內諱敗舉其可道者也不言其人以吾敗也不言及之者為內諱也

胡傳

邾人以須句故出師公卑邾不設備我師敗績魯既敗績邾亦幾亡輕用師徒害及兩國亦異

於誅暴禁亂之兵矣故諱不言公而書及內以諱為貶

集說

劉氏敞曰何以不言師敗績戰而不言師敗績者敗在內也師敗績不言及之者恥也張氏

洽曰書及公戰也不言敗諱恥也觀此則知春秋取須句非有存亡繼絕之公心審矣趙氏鵬飛曰內戰

不書敗書戰即敗矣蓋為內諱也內以諱為貶內不書公亦為內諱也不書敗不書公其貶可知故云內

以諱  
為貶

冬十有一月己巳朔宋公及楚人戰于泓宋師敗績

杜泓

注水名今在河南歸德府柘城縣北三十里

左傳

楚人伐宋以救鄭宋公將戰大司馬固諫曰天

一月己巳朔宋公及楚人戰于泓宋人既成列楚人未既濟司馬曰彼衆我寡及其未既濟也請擊之公曰不可既濟而未成列又以告公曰未可既陳而後擊之宋師敗績公傷股門官殲焉國人皆咎公公曰君子不重傷不禽二毛古之為軍也不以阻隘也寡人雖亡國之餘不鼓不成列子魚曰君未知戰勅敵之人隘而不列天贊我也阻而鼓之不亦可乎猶有懼焉且今之勅者皆吾敵也雖及胡者獲則取之何

有於二毛明恥教戰求殺敵也傷未及死如何勿重  
若愛重傷則如勿傷愛其二毛則如服焉三軍以利  
用也金鼓以聲氣也利而用之  
阻隘可也聲盛致志鼓儼可也

公羊

宋公與楚人期戰于泓之陽楚人濟泓而來有  
司復曰請迨其未畢濟而擊之宋公曰不可吾

聞之也君子不厄人吾雖喪國之餘寡人不忍行也  
既濟未畢陳有司復曰請迨其未畢陳而擊之宋公  
曰不可吾聞之也君子不鼓不成  
列已陳然後襄公鼓之宋師大敗

穀梁

泓之戰以為復雩之恥也雩之恥宋襄公有以  
自取之伐齊之喪執滕子圍曹為雩之會不顧

其力之不足而致楚成王成王怒而執之故曰禮人  
而不答則反其敬愛人而不親則反其仁治人而不  
治則反其知過而不改又之是謂之過襄公之謂也  
古者被甲嬰冑非以興國也則以征無道也豈曰以

報其恥哉宋公與楚人戰于泓水之上司馬子反曰  
楚衆我少鼓險而擊之勝無幸焉襄公曰君子不推  
人危不攻人厄須其出旣出旌亂於上陳亂於下子  
反曰楚衆我少擊之勝無幸焉襄公曰不鼓不成列  
須其成列而後擊之則衆  
敗而身傷焉七月而死

胡傳

襄公伐齊之喪奉少奪長使齊人有殺無虧之  
惡有敗績之傷罪一也桓公存三亡國以屬諸

侯義士猶曰薄德而一會虐二國之君罪二也曹人  
不服盍姑省德無闕然後動而興師圍之罪三也凡  
此三者不仁非義而獨愛重傷與二毛亦何異陳仲  
子以避兄離母居於陵為廉乎故書及以貶之也

集說

劉氏敞曰戰而言及之者主之者也又曰公羊  
以謂雖文王之戰不過是也非也文王何容易

哉德不加焉則不以力爭義不過焉則不以威制漸  
之以道摩之以仁而四方自服爾今襄公退不務修

其業而進徒守咫尺之信夫其守信誠是也則不若緩修吾德無亟大功以殘百姓也今論其守信之節而忘其殘民之本而以比之文王其不知聖人亦深矣又曰穀梁曰春秋三十有四戰未有以尊敗乎卑以師敗乎人者也非也適宋公以師敗乎人爾春秋據事實錄非以為褒貶也今年及邾人戰于升陘穀梁曰不言及之者為內諱也蓋指魯公公尊人卑何謂未有以尊敗乎卑者哉又曰以尊敗乎卑以師敗乎人則驕其敵襄公以師敗乎人而不驕其敵何也責之也吾不知於春秋何以為驕其敵何以為不驕其敵其驕其敵也如何褒之其不驕其敵也如何責之所以為褒之責之也如何書之今此宋公穀梁以謂不驕其敵者於經何以驗之哉又曰道之貴者時其行勢也似責宋公不早擊楚於險而失機會也何其悖乎如宋公之用心不鼓不成列慄慄乎忠厚有德之人哉雖師敗國削猶非其恥也春秋豈惡其不

能以詐取勝哉凡泓之戰公羊以為襄穀梁以為貶言貶者非也言襄者亦未是王氏沿曰楚子稱人微之也微楚子亦所以譏宋公也張氏洽曰春秋以襄公主是戰則知聖人罪其復諫求欲昧大義而徇小節以取敗國殄民自及其身之禍楚子救鄭而不言救又貶稱人惡之也黃氏仲炎曰宋襄公自執滕用鄫以失人心為楚所執今乃不量力而鬪以僥倖於萬一衆敗身夷不亦宜乎趙氏鵬飛曰楚人伐宋以報伐鄭之師也宋方脫釁鼓之餘而歸不能責躬自咎內輯其國外和四鄰修德養威待時而動乃以區區三小國之師以伐鄭鄭不可得而楚肆其暴一戰奔北幾至於亡此誰之咎哉宋自取也汪氏克寬曰宋以衛侯許男滕子伐鄭而泓戰止書宋公者蓋夏首伐鄭之師既歸及秋楚救鄭不及因遂伐宋宋公帥師往逆之而與戰欲雪孟之恥而不得其力之不能也宋公身傷而不言宋公敗績猶為



宋諱辱爾若楚君  
敗績則直書之矣

附錄左傳

丙子晨鄭文夫人羊氏姜氏勞楚子於柯  
澤楚子使師緡示之俘馘君子曰非禮也

婦人送迎不出門見兄弟不踰閭戎事不邇女器  
丁丑楚子入饗於鄭九獻庭實旅百加籩豆六品饗畢  
夜出文芊送於軍取鄭二姬以歸叔詹曰楚王其不  
沒乎為禮卒於無別無別不可謂禮將何以沒諸侯  
是以知其不遂霸也

柯澤杜  
注鄭地

甲襄王十  
申五年

二十有三年

宋襄十四年齊孝六年晉惠十  
四年衛文二十三年蔡莊九年

鄭文三十六年曹共十六年陳穆十一年杞  
成十八年秦穆二十三年楚成三十五年

春齊侯伐宋圍緡

緡忙巾切穀作閔後同緡杜注宋邑高平昌邑縣東南有東緡城今在

山東兗州府金鄉縣東北三十里

左傳

以討其不與盟於齊也

公羊

邑不言圍此其言圍何疾重故也

穀梁

伐國不言圍邑此其言圍何也不正其以惡報惡也

胡傳

齊霸國之餘業也宋襄公既敗于泓荆楚之勢益張矣齊侯既無恤災患畏簡書之意又乘其

約而伐之尤義之所不得為者也故書伐國而言圍邑以著其罪然則桓公伐鄭圍新城何以不為貶乎鄭與楚合憑陵諸國宋與楚戰兵敗身傷其事異矣美惡不嫌同詞

集說

何氏休曰襄公欲行霸為楚所敗諸國之君宜雜然助之反因其困而伐之不仁也范氏甯

曰宋伐齊之喪是惡也今齊乘勝而報是以惡報惡也孫氏復曰楚人敗宋公于泓齊侯視之不救而

又加之以兵故伐圍竝書以誅其惡趙氏鵬飛曰嗚呼齊孝之斯舉可謂以怨報德爾孝公之得齊宋

故也顧之戰宋襄為之敗齊師殺無虧拒魯却狄以納之其德大矣今宋不幸為楚所敗奔北之餘國幾

不國而齊孝利其危而伐之且圍其邑人之非人一至此哉聖人書爵所以愧之也家氏鉉翁曰齊孝

非宋襄之力則不能有國顧忘納己之德乘其敗而圍其邑所謂以怨報德刑戮之民也齊侯書爵以其

背大惠而忍於為不義故目其人而誅之書伐書圍皆所以貶也吳氏澂曰楚與諸侯盟於齊乘間以

干列國爾齊侯不悟而受其盟宋之不與盟於齊不愆義也齊反借此為名以責宋伐之於敗傷之後悖

理甚矣汪氏克寬曰春秋無義戰彼善於此則有之經書伐國圍邑者四齊桓伐鄭圍新城討其從楚之罪予之也宋殤忌公子馮而遷怒伐鄭圍長葛楚顯虐列國而圖伯伐宋圍繆與此年齊孝之忘大德而修小怨皆貶之也蓋討得其罪則諸侯遂圍許圍宋彭城同圍齊春秋不以為譏不能修德而徒恃兵力則雖攻內邑之背叛如圍棘圍費圍鄆圍郕而春秋未嘗與之也

夏五月庚寅宋公茲父卒

茲公作慈

左傳

夏五月宋襄公卒傷於泓故也

公羊

何以不書葬盈乎諱也

集說

劉氏敞曰穀梁曰其不葬何也失民也其失民何也以其不教民戰則是棄其師也非也宋公

不忍厄人於險而致敗爾豈不教民戰者乎審如穀  
梁言泓之敗何不書宋棄其師乎周末時諸侯交爭  
恥守信而好奇功故穀梁子亦以宋公為非張氏  
洽曰僖公已有志於附楚忘盟薄之信故不會宋襄  
之葬趙氏鵬飛曰齊桓之霸修外而不修內故不  
免於怠若宋襄者內外兩不修而至於亡者也彼其  
受齊桓將死之託而納孝公以為霸統在已故伐齊  
之師未反而執滕子既執滕子則遽為曹南之盟以  
謂諸侯無敢不從者矣既而來盟者惟二小國鄆子  
既期又後會焉於是怒而用鄆子既為不道曹故叛  
之乃罄兵以圍曹滕怨鄆亡曹叛邾去則宋之為宋  
惇然而已而陳蔡又召楚人而盟于齊則東諸侯一  
舉從楚矣乃會楚人為鹿上之盟以求諸侯夫諸侯  
豈可求於楚哉楚得諸侯肯挈以遺宋乎秋復為孟  
之會諸侯皆在楚即會而執之于薄之會脫囚以歸  
宜其自咎而修己睦鄰養威植德外懷諸侯而徐圖

大舉也復不自量伐鄭以觸楚之怒以招楚兵一敗塗地身傷兵喪鬱鬱而死此豈諸侯叛之楚人疾之也哉其所以圖霸者非其道也內不修德外不修政國人不允諸侯皆貳乃欲以頃刻霸天下非愚不如是之疎且謬也不書葬諸侯從楚不會爾

# 秋楚子伐陳

左傳

秋楚成得臣帥師伐陳討其貳於宋也遂取焦夷城頓而還子文以為之功使為令尹叔伯曰

子若國何對曰吾以靖國也夫有大功而無貴仕其人能靖者與有幾

焦杜注陳邑譙縣也今為亳州屬江南鳳陽府夷杜注陳邑譙郡城父縣今故城在亳州東南

頓杜注頓國汝陰南頓縣今河南開封府項城縣北有南頓故城

集說

吳氏澂曰曹南之盟陳不從宋伐鄭之役陳亦不從宋盟齊則陳從楚會孟執宋公伐宋則陳

從楚考之經唯見陳之服於楚不見陳之貳於宋今楚討陳之貳蓋以伐宋之後鄭畏而朝楚而陳未朝

楚即誣以貳宋之罪伐之而取其二邑積其勢不至於滅陳不已也李氏廉曰陳頓之爭始此二十五

年楚圍陳以納頓  
襄四年陳人圍頓

附錄左傳

九月晉惠公卒懷公命無從亡人期期而不至無赦狐突之子毛及偃從重耳在秦

弗召冬懷公執狐突曰子來則免對曰子之能仕父教之忠古之制也策名委質貳乃辟也今臣之子名

在重耳有年數矣若又召之教之貳也父教子貳何以事君刑之不濫君之明也臣之願也淫刑以逞誰

則無罪臣聞命矣乃殺之卜偃辭疾不出曰周書有之乃大明服已則不明而殺人以逞不亦難乎民不

見德而惟戮是聞其何後之有

# 冬十有一月杞子卒

左傳

杞成公卒不書名未同盟也凡諸侯同盟死則赴以名禮也赴以名則亦書之不然則否辟不

敏也

集說

劉氏敞曰杞其稱子何也貶孰貶之天子貶之何用知其天子貶之非天子不制度不議禮不

考文春秋之進賢也不記實其退不肖也不亂名然則杞之名何也公也杞何以稱公王者之後稱公杞

夏之後也宋殷之後也王者必將二王之後行其正朔報其禮樂以賓於天子尊賢之義也程子曰杞

二王後而伯爵疑前世黜之也中間子之後復稱伯高氏閔曰不名者史逸之又曰入春秋以來始書



杞卒 湛氏若水曰左氏謂杞成公卒書曰子杞夷也胡氏從之非也若杞從夷則其卒也無赴無赴則不書矣或子或伯史之文爾焉得謂聖人黜伯而子之又升子而伯之耶

### 附錄左傳

晉公子重耳之及於難也晉人伐諸蒲城蒲城人欲戰重耳不可曰保君父之命而

享其生祿於是乎得人有人而校罪莫大焉吾其奔也遂奔狄從者狐偃趙衰顓頊魏武子司空季子狄人伐廬咎如獲其二女叔隗季隗納諸公子公子取季隗生伯儵叔劉以叔隗妻趙衰生盾將適齊謂季隗曰待我二十五年不來而後嫁對曰我二十五年矣又如如是而嫁則就木焉請待子處狄十二年而行過衛衛文公不禮焉出於五鹿乞食於野人野人與之塊公子怒欲鞭之子犯曰天賜也稽首受而載之及齊齊桓公妻之有馬二十乘公子安之從者以為不可將行謀於桑下蠶妾在其上以告姜氏姜氏殺

之而謂公子曰子有四方之志其聞之者吾殺之矣  
公子曰無之姜曰行也懷與安實敗名公子不可姜  
與子犯謀醉而遣之醒以戈逐子犯及曹曹共公聞  
其駢脅欲觀其裸浴薄而觀之僖負羈之妻曰吾觀  
晉公子之從者皆足以相國若以相夫子必反其國  
反其國必得志於諸侯得志於諸侯而誅無禮曹其  
首也子盍早自貳焉乃饋盤飧寘璧焉公子受飧反  
璧及宋宋襄公贈之以馬二十乘及鄭鄭文公亦不  
禮焉叔詹諫曰臣聞天之所啓人弗及也晉公子有  
三焉天其或者將建諸君其禮焉男女同姓其生不  
蕃晉公子姬出也而至於今一也離外之患而天不  
靖晉國殆將啓之二也有三士足以上人而從之三  
也晉鄭同儕其過子弟固將禮焉況天之所啓乎弗  
聽及楚楚子饗之曰公子若反晉國則何以報不穀  
對曰子女玉帛則君有之羽毛齒革則君地生焉其  
波及晉國者君之餘也其何以報君曰雖然何以報

我對曰若以君之靈得反晉國晉楚治兵過於中原其辟君三舍若不獲命其左執鞭弭右屬橐鞬以與君周旋子玉請殺之楚子曰晉公子廣而儉文而有禮其從者肅而寬忠而能力晉侯無親外內惡之吾聞姬姓唐叔之後其後衰者也其將由晉公子乎天將興之誰能廢之違天必有大咎乃送諸秦秦伯納女五人懷嬴與焉奉匜沃盥既而揮之怒曰秦晉匹也何以卑我公子懼降服而囚他日公享之子犯曰吾不如衰之文也請使衰從公子賦河水公賦六月趙衰曰重耳拜賜公子降拜稽首公降一級而辭焉衰曰君稱所以佐天子者命重耳重耳敢不拜

廬咎如杜注赤狄之別種也五鹿杜注衛地衛縣西北有地名五鹿陽平元城縣亦有五鹿今直隸大名府五鹿城二屬元城縣者即沙鹿城屬開州者此衛地五鹿是也

乙襄王十  
酉六年

二十有四年

齊孝七年晉惠十五年衛文二  
十四年蔡莊十年鄭文三十七

年曹共十七年陳穆十二年杞桓公姑容元年宋  
成公王臣元年秦穆二十四年楚成三十六年

春王正月

附錄左傳

春王正月秦伯納之不書不告入也及河  
子犯以璧授公子曰臣負羈縻從君巡於

天下臣之罪甚多矣臣猶知之而況君乎請由此亡  
公子曰所不與舅氏同心者有如白水投其璧於河  
濟河圍令狐入桑泉取臼衰二月甲午晉師軍於廬  
柳秦伯使公子絳如晉師師退軍於郟辛丑狐偃及  
秦晉之大夫盟於郟壬寅公子入於晉師丙午入於  
曲沃丁未朝於武宮戊申使殺懷公於高梁不書亦  
不告也呂卻畏偁將焚公宮而弑晉侯寺人披請  
見公使讓之且辭焉曰蒲城之役君命一宿女即至

其後余從狄君以田渭濱女為惠公來求殺余命女  
三宿女中宿至雖有君命何其速也夫祛猶在女其  
行乎對曰臣謂君之入也其知之矣若猶未也又將  
及難君命無二古之制也除君之惡唯力是視蒲人  
狄人余何有焉今君即位其無蒲狄乎齊桓公置射  
鉤而使管仲相君若易之何辱命焉行者甚衆豈唯  
刑臣公見之以難告三月晉侯潛會秦伯於王城已  
丑晦公宮火瑕甥卻芮不獲公乃如河上秦伯誘而  
殺之晉侯逆夫人嬴氏以歸秦伯送衛於晉三千人  
實紀綱之僕初晉侯之豎頭須守藏者也其出也  
竊藏以逃盡用以求納之及入求見公辭焉以沐謂  
僕人曰沐則心覆心覆則圖反宜吾不得見也居者  
為社稷之守行者為羈紲之僕其亦可也何必罪居  
者國君而讎匹夫懼者甚衆矣僕人以告公遽見之  
狄人歸季隗於晉而請其二子文公妻趙衰生原  
同屏括樓嬰趙姬請逆盾與其母子餘辭姬曰得寵

而忘舊何以使人必逆之固請許之來以盾為才固請於公以為嫡子而使其三子下之以叔隗為內子而已下之晉侯賞從亡者介之推不言祿祿亦弗及推曰獻公之子九人唯君在矣惠懷無親外內棄之天未絕晉必將有主主晉祀者非君而誰天實置之而二三子以為己力不亦誣乎竊人之財猶謂之盜況貪天之功以為己力乎下義其罪上賞其姦上下相蒙難與處矣其母曰盍亦求之以死誰懟對曰尤而效之罪又甚焉且出怨言不食其食其母曰亦使知之若何對曰言身之文也身將隱焉用文之是求顯也其母曰能如是乎與女偕隱遂隱而死晉侯求之不獲以緜上為之田曰以志吾過且旌善人

令狐今山西平陽府猗氏縣西十五里有令狐城桑泉杜注在河東解縣西今平陽府臨晉縣東十三里有桑泉城白衰杜注解縣東南有白城今平陽府解州西北廬柳今山西平陽府猗氏

# 夏狄伐鄭

縣西北有廬柳城 郇杜注解縣西北有郇城今  
在山西平陽府臨晉縣東北十五里 高梁杜注  
平陽楊縣西南僖九年十五年及此杜氏三注稍  
異其實一地也 縣上杜注西河介休縣南有地  
名縣上今山西汾州府沁源縣  
北八十里有縣上關縣上城

左傳

鄭之入滑也滑人聽命師還又即衛鄭公子士  
洩堵俞彌帥師伐滑王使伯服游孫伯如鄭請

滑鄭伯怨惠王之入而不與厲公爵也又怨襄王之  
與衛滑也故不聽王命而執二子王怒將以狄伐鄭

富辰諫曰不可臣聞之大上以德撫民其次親親以  
相及也昔周公弔二叔之不咸故封建親戚以蕃屏  
周管蔡邶霍魯衛毛聃郇雍曹滕畢原鄆郇文之昭  
也邠晉應韓武之穆也凡蔣邢茅胙祭周公之胤也

召穆公思周德之不類故糾合宗族於成周而作詩  
曰常棣之華鄂不韡韡凡今之人莫如兄弟其四章  
曰兄弟鬩于牆外禦其侮如是則兄弟雖有小忿不  
廢懿親今天子不忍小忿以棄鄭親其若之何庸勲  
親親暱近尊賢德之大者也即聾從昧與頑用嚚姦  
之大者也棄德崇姦禍之大者也鄭有平惠之勲又  
有厲宣之親棄嬖寵而用三良於諸姬為近四德具  
矣耳不聽五聲之和為聾目不別五色之章為昧心  
不則德義之經為頑口不道忠信之言為嚚狄皆則  
之四姦具矣周之有懿德也猶曰莫如兄弟故封建  
之其懷柔天下也猶懼有外侮扞禦侮者莫如親親  
故以親屏周召穆公亦云今周德既衰於是乎又渝  
周召以從諸姦無乃不可乎民未忘禍王又興之其  
若文武何王弗聽使顏叔桃子出狄師夏狄伐鄭  
取櫟王德狄人將以其女為后富辰諫曰不可臣聞  
之曰報者倦矣施者未厭狄固貪惓王又啓之女德



無極婦怨無終狄必為患王又弗聽初甘昭公有寵於惠后惠后將立之未及而卒昭公奔齊王復之又通於隗氏王替隗氏顏叔桃子曰我實使狄狄其怨我遂奉大叔以狄師攻王王御士將禦之王曰先后其謂我何寧使諸侯圖之王遂出及坎欲國人納之秋顏叔桃子奉大叔以狄師伐周大敗周師獲周公忌父原伯毛伯富辰王出適鄭處於汜大叔以隗氏居於溫

管杜注管國在滎陽京縣東北隋置管城縣今河南開封府鄭州治廢管城是也毛杜注宋邑今

河南河南府宜陽縣界雍杜注雍國在河內山陽縣西今河南懷慶府修武縣西有雍城畢杜

注畢國在長安縣西北今陝西西安府咸陽縣北五里有畢原鄧杜注鄧國在始平鄧縣東今鄧

縣屬西安府應杜注應國在襄陽城父縣西今河南汝寧府寶豐魯山二縣界有應城蔣杜注

在弋陽期思縣今河南開封府尉氏縣西六十里有蔣城茅杜注高平昌邑縣西有茅鄉今山東

兗州府金鄉縣西北四十里有昌邑城其西有茅鄉古茅國也昨杜注東郡燕縣西南有昨亭今

河南衛輝府昨城縣是也縣東有東燕故城杜注召穆公采地扶風雍縣東南有召亭案此召

亭今陝西鳳翔府境其山西平陽府垣曲縣之召原則東遷後別受采地也甘杜注王子帶食邑

河南縣西南有甘水西二十五里有故甘城今河南府洛陽縣即河南縣也甘城甘水俱在縣西南

坎飲杜注周地在河南鞏縣東 汜杜注 鄭南汜也在襄城縣南今屬河南開封府

集說

許氏翰曰鄭執王使王啓狄師天下何恃不亂冢氏鉉翁曰案左氏鄭不聽王命而執其使

非叛而何王怒而討之春秋不書鄭之叛狄之所以伐何哉曰王問鄭人之罪齊魯宋衛豈無敵愾者乃

命狄出師春秋書狄伐鄭繼書天王出居于鄭以見禍本在此可不謹哉朱氏睦揅曰鄭在王畿王所倚毗顏叔桃子將欲叛王故先伐鄭此蓋為叔帶謀也伐鄭果出王意是年王出居於鄭伐鄭而依鄭無是理也

### 附錄左傳

鄭子華之弟子臧出奔宋好聚鵠冠鄭伯聞而惡之使盜誘之八月盜殺之於陳宋

之間君子曰服之不衷身之災也詩曰彼己之子不稱其服子臧之服不稱也夫詩曰自貽伊戚其子臧之謂矣夏書曰地平天成稱也宋及楚平宋成公如楚還入於鄭鄭伯將享之問禮於皇武子對曰宋先代之後也於周為客天子有事膳焉有喪拜焉豐厚可也鄭伯從之享宋公有加禮也

## 秋七月

# 冬天王出居于鄭

左傳

冬王使來告難曰不穀不德得罪於母弟之寵子帶鄙在鄭地汜敢告叔父臧文仲對曰天子

蒙塵於外敢不奔問官守王使簡師父告於晉使左  
鄆父告於秦天子無出書曰天王出居于鄭辟母弟  
之難也天子凶服降名禮也鄭伯與孔將鉏石甲  
父侯宣多省視官具於汜而後聽其私政禮也

公羊

王者無外此其言出何不能乎母也魯子曰  
是王也不能乎母者其諸此之謂與

穀梁

天子無出失天下也居者居其所也雖失天下莫敢有也

胡傳

案左氏鄭人入滑王為滑請鄭不聽命王怒使  
頹叔出狄師伐鄭而德狄人立其女隗氏為后

富辰諫不聽大叔帶通於隗氏王絀狄女頹叔懼狄  
之怨已遂奉叔帶以狄師攻王王適鄭處於汜自周

無出特書曰出者言其自取之也夫鄭伯不王國有罪矣襄王不知自反念其制命之未順也忍小忿暱懿親以扞外侮而棄德崇姦遂出狄師不亦僨乎王者以天下為家京師為室而四方歸往猶天之無不覆也東周降於列國既不能家天下矣又毀其室而不保則是寄生之君耳貶而書出以為後戒

集說

杜氏預曰襄王也天子以天下為家故所在稱居天子無外而書出者譏王蔽於匹夫之孝不

顧天下之重因其辟母弟之難書出言其自絕於周范氏甯曰王者無外言出則有外之辭江熙曰天子必巡守然後行故河陽之守全天王之行也襄王奔鄭不得全天王之行則與諸侯不異故書出也邵曰雖實出奔而王者無外王之所居則成王畿鄭不敢有之以為國孔氏穎達曰出居實出奔也以出居為名而不書奔殊之於列國啖氏助曰天子不言出獨襄王書出者雖居於鄭若出在四海之外然

王者至尊故不曰奔雖在外皆曰居 陸氏淳曰淳聞於師曰天王雖自出鄭伯莫敢有其土故曰居禮云天子無客禮莫敢為主焉此之謂也 葉氏夢得曰諸侯國內曰居國外曰在諸侯以國為家者也天子內外皆曰居天子以天下為家者也天子諸侯於盟會征伐之事未嘗書出義可得而行也至於出居于鄭則失其位矣然後書出蓋大有天下小有一國皆其所當守而不可失安有內難不能正而反避之於外以託於諸侯歟 陳氏傅良曰王出不書為尊尊諱也子頹之難惠王未有過也鄭虢圖之執燕仲父殺子頹逾年而復辟故諱之也襄王以狄伐鄭富辰諫弗聽又德狄以狄女為后諫弗聽子帶以狄師攻王於是適鄭書曰天王出居于鄭以為無足諱焉爾 張氏洽曰今案鄭非王居而言居于鄭者普天之下莫非王土也然王之失德自我致寇故自周無書出者而特書出居于鄭如王者無敵而書王師敗

績于茅戎皆言其自取之以見天難忱斯不易惟王不可以不戒也 劉氏克莊曰襄王已出而書居于

鄭敬王未入而書居于翟泉國不可一日無君春秋所以立天下之防也 趙氏鵬飛曰天王出居于鄭

志出入之實爾三傳鑿為異論曰天子無出又曰王者無外故不言出出失天下也夫一視同仁王者之

心此所謂無外也豈謂王者一出而遂有外乎一舉足而出天下遂非其天下乎書曰王出郊天乃雨反

風禾則盡起康王之誥曰王出在應門之內太保率諸侯入應門左易曰王用出征以正邦也聖人書出

居于鄭志天王出而天下無勤王者非謂王不可出而出也曲禮有天子不言出之文蓋漢儒雜取春秋

三傳之說非春秋三傳之前先有是言也不可以此反證春秋學者不以易書聖人之言求之乃以漢儒

之說為證非所謂達者也且春秋書天王在外者三此年天王出居于鄭昭二十二年劉子單子以王猛

居于皇二十三年天王居于狄泉王猛恭王不書出而獨襄王書出者王猛立于皇未得入成周也恭王立于狄泉亦未得入成周也是二王者皆即其地而立非自內立而出居于外也其實非出安可言出今襄王自僖九年立至是十六年叔帶逼王而王出居于鄭實自內出豈可不書出斯二者文各適其事非故書出以外襄王不書出以內王猛恭王也不考其事以察聖人之言因謂聖人書出所以貶襄王噫襄王之出豈得已哉自古有兄弟之難者二舜於象則封之周公於管蔡則誅之皆不得已也周公上無母氏之愛而下有宗社之危故寧誅之以存宗社舜以頑父嚚母之所愛誅之則傷孝心故封之以慰父母今叔帶者惠王陳媯之所愛也殺父母之所愛則與鄭莊公何異故寧避之而出居于鄭文武之神靈未泯天下必有勤王者此襄王之心也以此貶襄王可乎貶襄王者自三傳天子無出之論始故吾援書易



聖人之言而正之 家氏鉉翁曰王者出謂之狩今  
以出書王不能正其家啓釁於狄失位而奔得罪宗  
廟謂春秋無貶不可也又曰春秋天王三出書法詳  
略各異惠王出入皆不書猶為周諱也至襄王出居  
于鄭不得諱矣然猶書出不書入至悼敬之出入記  
之不遺閔周室傾覆將無以為國不得已而書也定  
六年敬王再出不書知其無興復之望矣 吳氏澂  
曰天王居于狄泉不書出者王雖去京師而猶在畿  
內也此則去畿內而越在諸侯之國故書出 程氏  
端學曰以天王而出居于鄭必有失其道而見逐於  
其臣者而以自出為文何哉孔子曰能治其國家誰  
敢侮之此春秋所以正本也鑒戒昭矣 李氏廉曰  
春秋書王居三鄭也狄泉也皇也書公居五昭公居  
鄆也 汪氏克寬曰叔帶之有寵於惠王猶子頹之  
有寵於莊王也叔帶之攻王猶子頹之伐王也襄王  
之適鄭處於汜猶惠王之適鄭處於櫟也然惠王之

處櫟不書而襄王出居于鄭特書之者所以罪襄王也夫叔帶之名戎伐京師已萌禍亂之階矣帶以罪奔齊踰十年而王復之苟能明大倫之義而不致褻狎全同氣之恩而俾無怨惡網紀截然亂何由作今襄王帥狄以泄憤於伯叔之國立狄女為天下之母又不謹男女之別於內廷拒諫而弗從臨難而莫禦犯此五不韙之罪則自取危辱視惠王蓋不侔矣故上書狄伐鄭而不曰王師及狄伐鄭者所以諱襄王之用狄也下書天王出居雖以自出著罪而特言出居又以明大一統之義然不書叔帶以狄伐京師猶為王諱惡也朱子綱目於代德僖宗之如陝州奔梁州走興元幸成都如寶雞皆不曰出而天寶之避寇特筆之曰帝出奔蜀蓋取法春秋書襄王出居之例也

案襄王之於叔帶有孝友之心而未得孝友之術也奔齊十年而必復之於周雖未合於有庠封象之制

然其心不可謂非友以狄來攻而不敢忘先后雖未合於東征滅親之義然其心不可謂非孝顧先儒多議之者則以經書出居而三傳有天子無出之說也獨趙氏鵬飛釋出居之義異於衆說其論襄王亦頗平允而天子無出之義相承已久故以三傳為主而並存趙氏

## 晉侯夷吾卒

集說

杜氏預曰晉文定位而後告惠公之喪故書於今年張氏洽曰案傳晉惠公以二十三年九


月卒其子圉懷公嗣立今年正月秦伯納文公重耳二月入於曲沃使殺懷公於高梁不書皆不告也杜預以為文公定位而後告惠公喪春秋據諸侯策書赴告而作經徐邈論之詳矣呂氏大圭曰左氏記惠公卒在去年九月蓋春秋所據者魯史也左氏所據者他國之史也年月不同不可得而考矣家氏

鉉翁曰惠之入春秋不書文之入亦不書公羊以為  
為文公諱桓文均有功於天下桓之入不諱文之入  
何為而諱蓋書不書有微旨焉桓之書為其殺子糾  
貶之文之入位乃其所宜有也高氏閔曰魯尚未  
與晉通而此書惠公卒者以見文公之入也文公不  
書入者以晉獻既殺世子申生則文公自以次當立  
故也卓氏爾康曰晉侯卒以前年九月新君定而  
後來告故即告時書之春秋重喪紀雖後亦書之也

附錄左傳

衛人將伐邢禮至曰不得其守國不  
可得也我請昆弟仕焉乃往得仕

欽定春秋傳說彙纂卷十四



覆校官檢討臣季學錦

校對官檢討臣陳夢元

謄錄監生臣吳紹恩